

MGA HEBREOHANON,

KAPITULO SIETE ²

✠ Panalanginan kamo! Siguro, una, aduna kita'y gagmay'ng masuso dinhi, nasulti sa ako kaganina lang ni Doc, nga igsoon ko, igsoon ko sa unod, nga gusto kono...para sa pagdedekar. Ug karon sa mga inahan nga gustong idedekar ang ilang mga gagmay'ng bata ngadto sa Ginoo, malipayon kami nga maidedekar sila karon dinhi busa moduol lang sila, dalhon lang ang ilang mga gagmay'ng bata dinhi.

²³⁹ Karon, ug daghang mga tawo, ilang, kanang ginatawang nilang, ginabautismohan ang masuso. Ginabuhat kana sa iglesiang Methodist, ug nagatoo ko mao usab sa Nazarene. Dili ko sigurado. Dili diay. Sa nahibaloan ko kana ang nahimong hinungdan nga nagkabulag sila, tungod sa pagpangbautismo sa masuso, ang Nazarene ug ang Free Methodist. Pero, bisan pa niana, ang uban kanila, kana ang ginabuhat ug dunay pipila pud nga lahi. Pero, ang uban kanila nagabubo og gamay'ng tubig sa masuso. Ang uban ginawisik-wisikan sila. Pero, naningkamot kita nga magpabilin duol sa Biblia kutob sa nahibaloan nato. Karon, walay Kasulatan sa Biblia nga nagaingon nga wisik-wisikan nato ang masuso, ni wala pud Kasulatan sa Biblia para wisik-wisikan nato ang si kinsa man. Wala gyud kini nakasubay sa Kasulatan. Usa ra kini ka sugo sa iglesiang Katoliko.

²⁴⁰ Pero sila—pero sila, gidala...Ginadala nila kaniadto ang gagmay'ng mga bata ngadto kang Jesus. Ug—ug kita nagarepresentar Kaniya. Gusto pud natong buhaton ang mao gihapon nga butang nga Iyang gibuhat kaniadto. Gipandong Niya ang mga kamot Niya sa mga bata ug—ug nagpanalangin kanila, ug nagsulti, “Pasagdi ninyo ang mga bata nga moduol Kanako, ug dili ninyo sila pagdid-an, kay alang kanila ang Gingharian sa Langit.” Ug mao kana ang padayon natong ginabuhat dinhi sa tabernakulo, sa pagpaninguha nato nga ipadayon ang tinuod nga Biblia, sa balaan nga pamaagi, kutob sa nahibaloan nato.

²⁴¹ Busa karon, kung ang mga inahan, o sa mga inahan nga dala-dala ang masuso nila nga idedekar, samtang ginatugtog ni Igsoong babayeng Gertie ang *Bring Them In*, sige, dad-on na ninyo sila dinhi sa altar. Ang atong igsoon ug ako manaog ug idedekar ang maong mga bata ngadto sa Ginoo. Sige.

Igsoong Neville. . . [Blangko nga bahin sa teyp—Ed.]

²⁴² Salamat, Igsoong Gertie. Maanindot gyud kana. Pila ba ang nahigugma sa gagmay'ng mga bata? Kung wala ka mahigugma,

aduna gyu'y sayup diha kanimo, aduna gyu'y sayup.

²⁴³ Karon, karong gabhiona, siguro moadto na kita sa uban pang bahin sa mga buluhaton. Kita . . . ang rason kon nganong ania ako pag-usab karong gabhiona. Kasagaran pag ingon-ani nga mga adlaw nga adunay mga panerbisyo sa pagpang-ayo, usa ra ka higayon ko kini mahimo sa usa ka adlaw, tungod kay ginapakurog ako niini. Dili mo gayud masulti. Ug dinhi sa atong lugar mas doble pa hinoon kalisud kay sa ubang lugar.

²⁴⁴ Ug gusto kong mangayo'g pasaylo sa nahimo kong sayup kaganinang buntag. Pero ang unang butang nga nagpabalaka kanako, maoy niadtong giduolan ako ni Billy para isulti sa ako nga dili kono siya makapangita og igong kadaghanon sa mga tawo para mahatagan og prayer kard. Mga dose o katorse ra man gani ang puede niyang mahatagan. Ug aduna siya'y . . . Wala na kono'y nangayo og prayer kard. Busa gipakaingon ko nga okay ra ang tanan. Busa dayon, tungod nga okay ra, wala ko na hunahunaa nga . . . Ug dayon sa dihang gisugdan ko na nga tawgon ang mga numero sa prayer kard, nagdahum ako nga moduol tanan kadtong napulo o dose, o kon pila ma'y nahatagan dinhi. Gipanawag ko na. Niadtong miabot ako sa usa ka numero, atua na, wala na'y mitubag. Ug gitawag ko kini pag-usab. Wala gihapon mitubag. Ug wala ko makasabot kung nganong nagkaingon niadtong man hangtud nga gitawag ni Mrs. Wood ang akong pagtagad. Ang sulti niya, "Igsoong Branham, si Billy man gud ginakuha niya ang mga kard ug ginasagol-sagol niya ang mga niini, ug ayha niya ipanghatag. Siguro nabilin lang kanang numero tres," (dili ba?) "nabilin niya ang numero tres sulod sa iyang bulsa."

²⁴⁵ Oo, tibuok singkwenta ang kasagaran niyang ginapanghatag. Sa dihang andam na niyang ipanghatag ang mga niini sa mga tawo, isagol-sagol niya uná kini. Para pud ang tanan . . . Walay magsulti'g, "Thatag sa ako ang numero uno ha." Kay, mamahimong dili kita magsugod sa numero uno. Mamahimong magsugod kita sa singkwenta, wala mo kabalo, ug magtawag kita pabalik. Tingali magsugod kita sa numero otso ug sunod-sunod na. Mamahimong magsugod kita sa numero baynte ug magsunod-sunod na. Wala kita kabalo. Pero iyang ginasagol-sagol ang mga niini ug ginapanghatag kini ngadto sa mga tawo kung gusto nila. Ug ako, ingon nga wala ako sa akong hunahuna kaganinang buntag, mahimong nanawag ko og dugang upat o lima pa, ug wala ma'y mitubag, tungod kay basin ang numero nila anaa man sa mga numero baynte o traynta, nakita n'yo. Ug, maayo na lang, ug gihan-ay sa Ginoo, pero wala kining—kining sobrang pagpangapura, sama sa kung anaa sa ubang dapit nga halayo sa atong lugar. Paningkamotan kong dili na gyud buhaton kadto—dili ko na gyud buhaton kadto pag-usab.

²⁴⁶ Pero, dinhi sa ato dili pa lang dugay, gipangamuyo ko

sa Ginoo nga kung hatagan Niya kita og usa ka maanindot nga panagtigum dinhi, gikasaad kong dili ko na—dili ko na pangayoon pa kadto sa Iya, tungod kay sobra ka malisud kini. Ug supak kini sa Kasulatan. Kita n'yo? Ug kung inyong... Mao kana ang nakapalisud pud kanako. Tungod kay, ingon nga nahibalo na niana, ginahatagan ako niini og—og ginahatagan ako og kapildihan, sa sugod pa lang. Kita n'yo? Pildi na ko, sa sugod pa lang.

²⁴⁷ Bisan pa man niana, adunay nagtawag sa usa ka igsoon kaganinang hapon. Gitawgan niini si Mrs. Wood. Ug ang ingon, kono, “Adunay igsoon sa simbahan nga nanawag kaganinang buntag, bahin sa usa ka lalaki nga grabe, grabe ang sakit, nga miduol kang Cristo kaganinang hapon, pagkahuman gyud.” Ang giingon nga miduol kono kang Cristo ang—ang maong lalaki nga adunay grabeng sakit.

²⁴⁸ Ug adunay usa pa, gisulti sa ako ni Mrs. Wood nga nahinabi ko kono ang igsoon niyang babaye, ang magulang niyang babaye, nga didto sa balay pa kono niya ako niadtong usa ka adlaw ug naniudto kauban niya, o nanihapon kauban niya, didto sa Kentucky. Ug kabalo ang Dios nga Makagagahum sa tanan nga wala ko kaila nianang babaye. Kita n'yo? Husto kana. Lamang... Labing gamhanan gayud ang mga panan-awon. Wala kita kabalo kung sa unsang paagi kini matuman o kung unsay mahitabo. Nag-agad kini sa Dios, ug kung unsa—kung unsa ma'y nahitabo. Pero nahibaloan ko pud, niadtong ginahulat ko sila, sa nagahulat ako didto.

²⁴⁹ Ug niadtong miaging adlaw sa dihang ania dinhi kadtong gamay'ng babaye, nga gitooohan nga adunay espirituhanong pag-ila, nga sa tan-aw ko pud, dili... Kita n'yo, kung ihatag kana sa Dios sa tibuok kalibutan, mamahimong maanindot gyud kana; pero kung husto kadtong babaye, supak kadto sa gisulti Niya kanako dinhi tabok sa dalan, nakita n'yo, pipila ka tuig na ang milabay. Ug gusto natong makasigurado nga husto gyud kadto, ug tugotan ang iglesia, nga makita kini, tungod nga dinhi kadto nahitabo. Ug busa nga gitawag ko ang usa ka Mrs. Snyder. Ang Igsoong babayeng Snyder. Sa pagtoo ko ania siya karon. Medyo maglisud lang siyang makadungog. Ug kadtong gamay'ng gining gihunghungan siya, ug ang ingon kono, “May rayuma ka,” o arthritis, mora'g ingon-ana.

²⁵⁰ Pero, kabalo ko nga bat-ang kadto nga nabali. Ug busa, ug dayon gikumpirma kana sa Balaang Espiritu kaganinang buntag. Kita n'yo?

²⁵¹ Karon, unsa man kini, usa kini ka Balaanong gasa, ug gawasnon kining nagapanglihok. Pero ang nagapalisud lang dinhi sa siyudad, sa tinuod lang, ako—ako nagakaproblema, kanunay, sa matag higayon nga magaampo ako para sa masakiton dinhi. O—o... Ideklara ko, isulti ngadto sa mga tawo.

Ideklara ko, isulti, “Karon giayo na kamo sa Ginoo. Giayo na kamo ni Jesus niadtong namatay Siya para sa inyo, dise-nuebe ka gatus ka tuig na ang milabay. Kaniadto pa lang giayo na kamo. Karon, para sa Dios, para kang Cristo, giayo na kamo, dise-nuebe ka gatus ka tuig na ang milabay. Wala na ang imong sakit. Gikinahanglan lamang ang imong pagtoo para kini mahinabo.”

252 Ug dayon molakaw na kining tawhana ug wala pa gihapon naayo. Dayon moadto ang maong tawo, moingon, “Gisultihan ko ni Igsoong Branham nga naayo na ako.” Kita n’yo? Ang ginasulti ko lang sa inyo maoy kung unsa ang gisulti sa Dios.

253 Karon, kung direktang gisulti kini ngadto sa usa ka tawo, direktang, “Kini’y MAO KINI ANG GINAINGON SA GINOO,” mahitungod sa usa ka butang nga mahitabo. Pamatud-an mismo niana sa inyo nga sigurado na ang inyong pagkaayo. Gisiguro na kana sa inyong pagtoo. Kita n’yo? Anaa na sa inyo ang saad. Dili ko kini pulong. Pulong kini sa Dios, nga naayo na kamo. Kita n’yo? Pero inyo man gud. . . Bisan pa nga ingon niana, ako—dili ko gyud mapatuhop kini sa inyo, sa inyo nga mga taga-Jeffersonville. Ako—dili ko gyud mahimo. Kabalo ko. Paningkamotan ko nga ipasabot kini kutob sa mahimo ko, ug kini lang—dili kini mahimo. Kana lang. Ang masulti ko. . .

254 Dinhi, dili pa lang dugay, miadto ako sa usa ka balay, sa usa ka lalaki, ug naghimalasyon na ang maong lalaki. Ug gitawgan nila ako, “Ari ka, iampo mo siya. Gisulti sa doktor nga dili na siya maugmaan.”

255 Misulod ako. Ug ang sulti niadtong batan-ong lalaki sa ako, “Mr. Branham, dili ko gustong mamatay.” Aba, dili gyud niya gustong mamatay. Aduna pa siya’y pamilya nga may duha ka anak didto.

256 Bueno, miluhod ako. Ingon ko, “Karon, tan-aw kanako, kinsa ba ang imong doktor?” Gisulti niya kanako. Ingon ko, “Karon, tingali gisulti sa doktor nga ikaw gyu’y—ikaw gyud mamatay na, pero wala pa gisulti sa Dios nga mamatay ka na.” Ingon ko, “Karon, sumala sa Biblia, naayo ka na, tungod kay namatay man si Jesus para sa imong pagkaayo.”

257 Ingon niya, “Nagatoo ka ba nga mamaayo ako?”

258 Ingon ko, “Hingpit ko nga ginatoohan kana.”

259 Bueno, kung moadto ako nga iampo ang usa ka tawo, ug wala nako gamita ang ingon nianang matang sa pagtoo, aron motoo para kaniya; kung miadto ako nga, “Oh, dili, dili, kung gisulti na sa doktor nga mamatay ka, mamatay ka gyud. Mao na gyud kana.” Karon, dili ba nga dili angay ang ingon nianang matang sa tawo ang moadto didto og mag-ampo para sa may sakit? Bisan ako ayaw ko og ingon niana ang moadto sa balay, aron mag-ampo alang kanako. Ang gusto nako usa ka tawo, nga bisan wala niya nakita, o dili niya makita, motoo gyud siya ug mobarug sa

saad nga gitagana alang kanako. Husto kana. Ug ingon ko . . . siya'y . . .

260 Nagpadayon kami ug nag-ampo. Ingon ko, “Karon magmaisugon ka.”

261 Ingon niya, “Buot mo bang ipasabot nga mamaayo na ako?”

262 Ingon ko, “Oo, lagi. Gisulti sa Pulong sa Dios nga mamaayo ka. Kita n’yo, ‘Kung ikaw makahimo sa pagtoo, ang tanang mga butang mahimo.’”

263 Ingon niya, “Sige, toohan ko Kini.” Ug migawas na dayon ko ug giingnan ang iyang asawa bahin niadto . . .

264 “Mamatay na siya, dili ba?”

265 “Oo, mamatay na siya.” Ug busa pagkasunod nga adlaw, namatay kadtong lalaki, o pipila ka adlaw pagkahuman niadto.

266 Dayon kadtong babaye mogawas na ug mag-inum-inum ug naalaot. Ug usa sa mga diyakono dinhi, sa pagtoo ko, sa niining iglesia, ang miduaw sa babaye ug naghangyo sa iya nga mobalik na ug magsimba pag-usab. Ingon sa babaye, “Wala na ko’y gitooan. Nag-anhi man dinhi si Magwawaling Branham ug nag-ampo para sa akong bana, nag-ingon siya nga mabuhi pa kono ang akong bana, ug namatay man gihapon pagkahuman sa duha o tulo ka adlaw. Busa, dili na ko motoo.” Karon *siya* na mismo ang naghimalatyon. Buweno.

267 Busa, mao nga, nakita n’yo, ginapakita lang niana nga wala gyud ginahatagan sa mga tawo og pagtagad kung unsa ang ginasulti mo. Kita n’yo? Sigurado. Kung nag-ampo ako para sa usa ka tawo, ug akong—isulti nako kanila nga mabuhi sila. Nagatoo ko nga mabuhi gyud sila. Pero, bisan pa, kung ang pulong nako hingpit gayud nga MAO KINI ANG GINAINGON SA GINOO, ug dili mo Kini toohan, mamatay gyud ka, bisan unsaon. Sigurado. *Ania* ang MAO KINI ANG GINAINGON SA GINOO, ug daghan kanila ang nakadawat mismo Niini pero nangamatay gihapon. Daghan kanila mipaingon sa impiyerno, sa dihang, MAO KINI ANG GINAINGON SA GINOO, “Dili n’yo man kinahanglan magpa-impierno.” Husto ba kana? Sigurado. Kita n’yo? Kini sa kung unsay . . . Basi kini tanan sa inyong pagtoo.

268 Si Igsoong Collins, wala siya siguro dinhi karong gabhiona. Pero sa pagpaminaw ko sa iya kaganinang buntag, mihatag siya og pinakamaisog nga pagpahinungod bahin niana. Kita n’yo? Kita n’yo? Gibuhat niya. Ingon niya, “Karon, ang mao rang pagtoo nga anaa ka dinhi, kinahanglan nga maanaa ka usab niana sa kung asa man. Tungod kay, pang-indibiduwal ang inyong pagtoo, dili sa imong denominasyon, kondili kang Cristo. Kinahanglan magkaaduna ka niana nga pagtoo.” Husto gyud kana. Sa walay duhaduha.

269 Ug ang Balaanong pagpang-ayo ginabasi gayud sa imong pagtoo. Pero sumala sa Pulong sa Dios, MAO KINI ANG GINAINGON SA GINOO, nga ang matag tawo naayo na niadtong namatay si Jesus didto sa Kalbaryo, “Siya gisamaran tungod sa atong mga kalapasan, tungod sa Iyang mga labod kita nangaayo *na*.” Husto ba? Nangaayo *na* kita. Giingon sa Biblia, “Naayo na kamo.” Busa ayaw ninyo ako basola, usa lamang ako nga magwawali sa Pulong. Lakaw isulti mo sa Dios nga sayup ang gisulti Niya sa inyo, ug siguradong isulti sa inyo sa Dios nga tungod kana sa inyong kahuyang. Kita n’yo? Busa, nagdepende kini sa imong pagtoo. Gisulti ni Jesus, “Kung mahimo mong toohan. Kung mahimo mong toohan.”

270 Karon, sa dihang madungog mo nga gipamatud-an sa Balaang Espiritu ang imong pagtoo ug gilig-on na kini, ug miingon, “MAO KINI ANG GINAINGON SA GINOO, ‘Ugma sa *niining* oras, magkaaduna ka og *niining* butang. *Niining* butang ang mahitabo. Mamahitabo kini niining lugara sa ingon *niining* paagi, ug mahimamat mo ang ingon *niining* butang dinhi. Mamahimo kanang usa ka ilhanan alang kanimo.’” Karon, bantayan mo kana og ayo. Usa kana ka nahuman na nga buhat, mismo dinhi karon.

271 Pero pagbahin na gani sa Balaanong pagpang-ayo, kinahanglan kong ipahimutang ang Balaanong pagpang-ayo sa mao rang sukaranan, sa parehong pamaagi, sama sa kaluwasan. Ang matag usa kaninyo, bisan unsa pa man ang nabuhat ninyo, luwas na kamo sukad niadtong pagkamatay ni Jesus, tungod kay namatay man Siya aron kuhaon ang mga sala sa kalibutan. Pero dili gyud kini mohatag kanimo og unsa man nga kaayohan hangtud nga personal mong dawaton kini ug masinati kini. Mao nga pagbahin sa inyong mga sala, napasaylo na ang mga niini. Husto kana. Siya . . . “Tan-awa ang Cordero sa Dios nga nagakuha sa mga sala sa kalibutan.” Kita n’yo? Tan-awa ra. Karon timan-i kana.

272 Karon, kabalo ko nga sa pagtudlo, sa mga Kasulatan, sagol-sagol kita dinhi sa kongregasyon. Ug daghang higayon, nga dinhi sa Basahon sa Mga Hebreohanon, nga medyo lalum kini nga Basahon . . . Siguro biyaan ko kini usá karon sa makadiyut lang. Sulayan ko usá karong gabii nga humanon ang katapusang bahin sa ika-7 nga kapitulo.

273 Ug karon daghang mga pangutana sulod sa inyong hunahuna, sa walay duda. Daghang sa inyo ang dunay mga pangutana, ug aduna pud ako, usab. Karon, sa sunod higayon, kung itugot sa Ginoo, pagbalik ko dinhi . . .

274 Moadto ako sa Michigan karon. Ug dayon, gikan sa Michigan, moadto ako sa Colorado. Ug gikan didto sa Colorado, mopadulong na pud sa West Coast. Karon—karon, pagnakabalik na mi, kung itugot sa Ginoo . . . Karon, wala pa ako kabalo. Kung

dili ako makaadto sa Chicago, sa Dominggo, basin ania na usab ako sa umaabot nga Dominggo sa gabii.

²⁷⁵ Karon anaa sa mga unom na ka semana nga wala na makabarug ang atong pastor dinhi sa pulpito, sukad nga gihisgotan nato kining—kining—kining, Basahon dinhi. Kita n'yo? Karon kita... Dili ko buut buhaton kana. Si Igsoong Neville usa ka pagkahiligugmaon, malulot, buutan nga igsoon. Ug sigurado pud ako nga gihigugma sa niining iglesia si Igsoong Neville.

²⁷⁶ Lain pa'y ako, samtang nga nagasulti ako mismo karon, adunay, taga-dinhi lang sa duol nga lugar, ang sad-an sa pagsulat og mga kard, para mapahawa si Igsoong Neville sa niining pulpito. Ako gyud ang kinahanglan n'yong atubangan pagbahin niana. Uh-huh. Husto kana. Uh-huh. Oo, sigurado gyud. Karon, gusto nako kamong... Miingon ang diya... butang nga mahitungod sa hunta sa mga diyakono. Walay labot ang hunta sa mga diyakono sa pastor. Wala gyud, sir. Ang kongregasyon, sa kinatibuk-an, ang aduna nianang tibuok kagahum. Dili ang... Ang hunta sa mga diyakono maoy mga pulis lamang dinhi sa iglesia, aron imintinar ang kahan-ayan ug uban pa. Pero pagbahin sa mga lagda, gikinahanglan nga uyunan gyud kini sa tibuok iglesia. Gitukod kining iglesia ibabaw sa soberanya sa lokal nga iglesia. Busa, wala sa ako ang pagdesisyon sa pagpapahawa sa pastor, o pagpahimutang og pastor dinhi. Ako ang may panag-iya niining lugar; gihatag kini sa iglesia. Kamong tanan ang iglesia. Kamong mga tawo ang adunay pagkontrolar. Kamo ang iglesia, mismo. Ug ang Iglesia, ang balaan nga Iglesia sa Dios ang adunay soberanya, nga iya sa Balaang Espiritu nga anaa nianang Iglesia. Ug ang ginabuhat ko lang maoy gipanag-iya ko ang lugar, nga gihatag nako kini ngadto niining iglesia, gihatag nako para himoong simbahan, ug wala kini'y buhis. Ug ang iglesia nagapili sa kaugalingon nilang mga pastor. Wala ko og unsa man nga kahilambigitan niana. Ug ang bugtong paagi lang nga mapahawa ang pastor, kung magdesisyon mismo ang maong pastor nga mohawa, o kung ang mayoriya sa mga boto sa iglesia maoy magsulti nga, "Pulihan na ang pastor." Mao lang kana ang paagi. Walay hunta sa mga diyakono ang makahimo niana. Ang buluhaton sa hunta sa mga diyakono mao lamang nga imintinar ang kahan-ayan ug ingon-anang mga butang sulod sa iglesia.

²⁷⁷ Ang mga tinugyanan, wala sila'y labot niini, ang mga pagpaayo lamang sa simbahan. Ug dili pud nila mabuhat kini hangtud nga magkaaduna usá og... Mag-miting ang tibuok hunta sa mga tinugyanan ug magdesisyon, "Tukoron nato ang ingon *niini*, o buhaton nato ang ingon *niana*." Dayon kinahanglan nilang konsultahon sa tesorero kung duna ba'y pondo sila para mabuhat kini. Oo, sir.

²⁷⁸ Pero kung adunay unsa mang reklamo batok sa kang bisan

kinsa nga miyembro, kung adunay reklamo ang usa ka miyembro batok sa usa pa, o kung adunay butang nga sayup, kinahanglan ninyong adtoon kanang igsoon, kamo mismo, ug makig-estorya kaniya, ikaw ug siya lang. Dayon kung ayaw nila kini dawaton, kung ingon-ana kinahanglan ninyo na nga buhaton ang sunod nga butang, dalhon ninyo ang usa sa mga diyakono o kung kinsa man, ug magpauban kamo ngadto nianang igsoon. Dayon kung ayaw niya kamo dawaton, ayha kamo moanhi ug isulti sa iglesia. Dayon kung ang iglesia. . . Dayon kung ayaw gihapon niyang dawaton ang gisulti sa iglesia, nan ang ingon sa Biblia, “Isipon mo silang sama sa usa ka pagano ug usa ka publikano.” Husto kana.

279 Ug ang si kinsa man nga nakabalo na nga sad-an ang usa ka tawo, ug wala mo sila adtoi ug nakigsulti, kung ingon-ana kabahin ka sa iglesia sa Dios nga manubag tungod nianang sala. Husto kana.

280 Ug kung ang kinsa mang tawo nga adunay—adunay reklamo batok sa usa ka diyakono, o batok sa diyakono o kang kinsa man sa iglesia, nagkinahanglan kini og tulo ka tawo. Tulo ka tawo ang kinahanglan moadto para magsulti, magsaksi, nga manggikan mismo sa baba sa duha o tulo ka saksi. Mag-adto kamo isulti sa pastor nga aduna kamo’y reklamo batok sa usa ka diyakono. Dayon kung aduna kamo’y reklamo batok sa usa ka diyakono, nga kining diyakono dili usa—usa ka matarung, dili usa—usa ka walay-ikasaway nga tawo. Kinahanglan man gud nga kuptan niya ang katungdanan isip diyakono, nga walay-ikasaway, ug dayon masuta mismo nga walay-ikasaway kaniya. Ug kung makaplagan sa kongregasyon nga wala magbuhat ang diyakono sa nakasangon nga katungdanan, kinahanglan mag-uban siya og tulo ug iduol kini ngadto sa pastor. Sultihan usa’ ang diyakono nga magpabilin sa iyang balay sa tibuok gabii. Ug dayon ang pastor. . . moadto sa atubangan ug tigumon ang kongregasyon, aron ipahibalo ang maong reklamo. Ug kung ang kongregasyon mobotar nga ipapadayon sa pangatungdanan ang diyakono, magpadayon sa gihapon ang maong diyakono. Kung siya mag- . . . mobotar nga matangtang sa pangatungdanan ang diyakono, sa niana mismong gabhiona pud magpili sila og bag-ong diyakono. Kita n’yo?

281 Busa, dili lang sa usa ka tawo nakasangon kini nga butang. Nakasangon kini sa mayoriya. Oo, sir. Kung baynte ang mobotar para kaniya, ug baynte-uno pud ang mobotar batok kaniya, matangtang gyud siya; o, magpadayon kung bali pud ang boto. Kita n’yo? Ingon niana, ang soberanya sa lokal nga iglesia ug, dayon, adunay katungod ang matag miyembro sa iglesia. Kung aduna ma’y mahitabo, nga sayup, nan puede silang moanha dayon, ug ang butang lang nga buhaton nila maoy magdangop sa atubangan sa Dios aron hingpit sila nga makasigurado nga walay babag ang paglihok sa iglesia.

²⁸² Pero ang tibuok ug bug-os nga kagahum sulod sa iglesia mao ang pastor. Basaha ninyo kana sa Biblia, tan-awa ninyo kung dili kana ang kahan-ayan sa Biblia. Husto gyud kana. Wala na gyu'y usa nga labaw pa sa anciano. Wala ako og unsa man nga kalabotan sa kung unsay buhaton dinhi ni Igsoong Neville. Anaa ra kana kaninyo ug ni Igsoong Neville. Kung gustong magwali ni Igsoong Neville og doktrina nga iya sa Saksi ni Jehovah, anaa ra kana sa iya ug kaninyo. Kita n'yo? Kung gusto niyang iwali ang unsa mang gustohon niya, tali na kana sa inyo ug kaniya. Kana lang. Kung mobotar ang kongregasyon para ipapabilin siya dinha, para iwali kana, okey ra kana. Anaa ra kana kaniya.

²⁸³ Ang bugtong butang lang nga aduna ako'y kalabutan, mao lamang nga ako ang tag-iya aning lugar. Ug kung aduna ma'y mahitabo, sama sa may naninguha nga tangtangan ang pastor, ug gusto nilang pagbotohan kana, dili ninyo mahimong ihangyo sa usa ka diyakono nga ipahigayon kana. Inyo kining iduol kanako. Dayon adtoan ko kamo, og sultihan, "Kung gusto ninyo nga tangtangan ang pastor, isulti ninyo sa ako ang rason kung ngano. Naa ba siya'y nabuhat?"

²⁸⁴ "Oo. Nasakpan namo siya, nga hubog." O, "Nasakpan namo siya nga *ingon niini* ang ginabuhat, o nagabuhat sa butang nga dili husto."

²⁸⁵ "Aduna ba kamo og tulo ka mga saksi bahin niana?"

²⁸⁶ "Oo. Aduna kami."

²⁸⁷ Kinahanglan uná nga masusi ang maong mga saksi. "Ayaw kamo pagdawat og sumbong batok sa anciano sa iglesia gawas nga may duha o tulo ka saksi, ug kinahanglan mapamatud-an uná nga may pruweba sila; batok sa usa ka anciano." Dayon kinahanglan nga manumpa kamo, nga nakita gyud ninyo; ug mapamatud-an gyud kini, nga nakita n'yo mismo.

²⁸⁸ Ug dayon, kung mapamatud-an ninyo, nan kinahanglan dayag nga sawayon kana nga sala, nga, "Sayup kini." Dayon moingon, "Kongregasyon, gusto ba ninyo pulihan ang inyong pastor?"

²⁸⁹ Ug kung mobotar ang kongregasyon nga, "Pasayloon siya, ug papadayonon lang siya," mao kana ang masunod. Kita n'yo? Kana, dili ba husto lang kana? Dili ba ingon niana man ang pagdumala sa iglesia? Mao kana ang gisulti sa Biblia. Wala kita dinhi mga obispo ug mga tagdumala, ug mga hunta ug uban pa, nga maoy magpahimutang *nining* usa ug nga may dakung awtoridad. Walay si kinsa man dinhi ang adunay awtoridad gawas lang sa Espiritu Santo. Husto kana. Siya ang nagapulí. Ug giila nato Siya isip ang mayoriya, kung unsa'y desisyon sa mga tawo.

²⁹⁰ Ug dayon kung gusto buhaton sa pikas bahin ang *ingon-ini*, ug ang pikas bahin usab gusto buhaton ang *ingon-ana*, ug ang pikas bahin nga midaug, ang pikas bahin usab nga

napildi, unsay buhaton nila? Kinahanglan sila nga moapil sa kadaghanan, moingon, “Nangasayup kami, kung ingon-ana. Mao nga mopadayon kita, tungod kay ang Espiritu Santo ang nagbuhat niana nga pagdesisyon.” Kita n’yo? Husto gyud kana.

²⁹¹ Sama na lang sa mga Democrat ug mga Republican, basta nagpabilin kita ingon nga usa ka demokrasya, isip nga mga Amerikano. Kung ang modaog mao’y mga Democrat, kinahanglan padayon lang nga magsuporta kanila ang mga Republican; pag ang mga Republican pud ang modaog, kinahanglan nga magpadayon pud nga magsuporta ang Democrat. Kita n’yo? Mao kana ang eksaktong nagapapadayon kanato ingon nga usa ka nasud. Pag gub-on nato kana, ginaguba lang nato ang atong demokrasya. Husto kana. Pagmosulti ang mga Democrat, “Dili na ako mosuportar; Republican man gud ang midaog.” Mamahugno gyud kita kung ingon niana. Ako taga-Kentucky: lig-on kita pagnagkahiusa, ug pagnagkabahin-bahin kita’y mapukan.

²⁹² Karon, kung aduna man kamo’y nahibaloan nga sayup sulod sa iglesia, mahitungod sa usa ka indibiduwal o usa ka tawo o kung unsa man, nan obligado gayud kamo ug manubag kamo sa atubangan sa Dios kung pasagdan ninyo kanang butanga; kamo mismo, ang iglesia. Karon, timan-i, wala kini nakasangon sa akong abaga. Nakasangon kini sa inyo. Ug kung adunay unsa mang sayup sulod sa iglesia, papanubagon kamo sa Dios sa nianang butang. Husto kana. Sa ingon nianang paagi Niya ginapadagan ang Iyang iglesia. Ingon niana kini diha sa Biblia. Ingon niana ang kahan-ayan sa Biblia. Ingon niana ang soberanya sa lokal nga iglesia. Ang ulo mao ang pastor. Husto kana. Amen.

²⁹³ Karon, moadto na kita niining bulahan, karaan nang Mensahe dinhi. Kamo, karon gusto ko nga mahibaloan ninyo kana. Narekord kini sa teyp, og timan-i ninyo, kining Mensahe. Ug kini nga mga narekord sa teyp nga iya sa iglesia, ang mga kahan-ayan ug mga lagda sa iglesia, nakarecord kini sa teyp. Mga sumala kana sa Biblia. Wala namo kini ginamando; walay nagmando-mando. Wala. Ang tanan, pare-pareho ra kitang tanan. Pero, aduna kita’y lider, kana mao ang pastor, basta gipangulohan siya sa Espiritu Santo. Matuod kana. Bueno.

²⁹⁴ Karon, dinhi, siguradong daghan gyu’y mga pangutana. Busa sa sunod nila nga pagpahibalo, ug gipasibya na ni Igsoong Neville sa radyo nga moanhiay na ako, ipangsulat lang ninyo ang inyong pangutana, para kamo ug ako makapaghisgot niana. Mahimo ba ninyo? Sige.

²⁹⁵ Kabalo ko nga natudlo ko na ang mahitungod sa ang pagkamalahutayon sa mga balaan. Naitudlo ko na ang kinatasang Pagka-Dios ni Jesus. Naitudlo ko na ang kasiguradohan para sa magtotoo, ug pagkatagana-nang-daan, pagpili-nang-

daan, ug daghan pang ingon nianang mga butang. Nga, kabalo ko, daghang mga legalista sa akong kongregasyon, nga maayo man kaná. Walay problema. Pero, karon, sa niining mga butang, ako usa ka legalista, usab, ug usa ako ka Calvinista. Ang Biblia lang ang akong ginatoohan. Kana lang.

²⁹⁶ Karon, kung ang pipila nianang, mga pangutana. Ug naitudlo ko na ang mahitungod sa mga ebidensya, mga sensasyon, ug uban pa, ug tanan na niadtong mga butang nga tingali dili kamo uyon. Busa usa sa niining umaabot nga gabii, siguro, himoon nato kini nga . . .

Naghinamhinam ka ba nga makabalik na dinhi? [Nagaingon si Igsoong Neville, “Dili oi.”—Ed.]

Himoon nato kini sa Miyerkules sa gabii, karong umaabot nga Miyerkules sa gabii, dayon akong—siguro ako nang—ako na kanang mapahigayon kung ingon-ana. Dad-a ang inyong pangutana sa Miyerkules sa gabii, ibutang ninyo dinhi sa entablado, kanang pangutana ninyo mahitungod sa Biblia, sige, og mahitungod sa mga gitudlo ko na hangtud karon. Ug sa mismong Miyerkules sa gabii na kana. Ug dayon sa sunod nga Dominggo, nianang higayona, siguro ako—kinahanglan atua na ako sa Chicago, niana. Ug gikan didto moadto na sab ko sa Michigan. Kung itugot sa Ginoo, ania na ako sa Miyerkules sa gabii, aron tubagon ang maong mga pangutana kutob sa akong mahimo. Ug karon kaloy-an unta sa Ginoo.

Karon iduko nato ang atong mga ulo, sa makadiyut lang.

²⁹⁷ Karon, mapanalanginong Ginoo, mao kini ang Imong dakung ekonomiya. Ang Imo kining iglesia. Ikaw ra, Ginoo, ang nagapanglihok, ug gusto namo nga magalihok sa paglihok sa amo sa Espiritu sa Dios. Ug ginaampo namo karon nga panalanginan Mo kami. Ug samtang ginabatbat pag-usab namo kining Mensahe, ug sa paghisgot namo sa niining laglum nga mga butang, ginaampo namo nga ipadayag sa Balaang Espiritu ang mga niini kanamo sumala sa among panginahanglan. Kay among ginapangamuyo kini sa Iyang Ngalan. Amen.

²⁹⁸ Karon, oh, akong . . . Kining Basahon sa Mga Hebreohanon, giisip ko kini nga usa sa maanindot nga mga Basahon.

²⁹⁹ Sa mga sunod nga adlaw, tingali mahimo nga ako’y—kinahanglan ko . . . mobiyahe ngadto sa ubang nasud, nga kana, kung igatugot sa Dios, Sa dili madugay buhaton ko kana. Kinahanglan kong moadto sa Africa sumala sa usa ka pananawon. Sa hunahuna ko dili ako magmalampuson sa akong mga panagtigum hangtud nga makaadto ako sa Africa ug tumanon kana nga pananawon. Karon, kung ingon-ana, siguro sa umaabot nga tingpamulak na.

³⁰⁰ Pero taliwala nianang panahona, gusto kong hisgotan ang usa pa ka basahon gikan sa Basahon sa Mga Hebreohanon, nga mao, ang ika-11 nga kapitulo sa Mga Hebreohanon, ug

magpabilin niana sulod sa mga usa ka semana nianang ika-11 nga kapitulo, ug hisgotan nato ang matag usa sa mga kinaiyahan o mga tawo dinha, ug ipakita ang ilang kinaiyahan. Kita n'yo? “Tungod sa pagtoo, si Noe,” dayon hisgotan nato ang kinabuhi ni Noe. “Tungod sa pagtoo, si Abraham,” dayon hisgotan nato ang kinabuhi ni Abraham. “Tungod sa pagtoo, si Abel,” dayon hisgotan ang kinabuhi ni Abel. Kita n'yo? Ug batbaton nato tanan. Gusto ba ninyo kana? [Nagaingon ang kongregasyon, “Amen.”—Ed.] Oh, kana’y mamahimong, mahisgotan nato ang tibuok Biblia kung ingon-ana. Ug dayon paninguhaon nato nga, siguro, mahimo nga, sulod sa, tibuok semana o napulo ka adlaw nga panagtigum, sunod-sunod nga panagtigum, nga mora’g rebaybal, sa umaabot niining bakasyon sa Kapaskuhan, o mga ingon niana, kung itugot sa Ginoo.

³⁰¹ Karon, sa ika-7 nga kapitulo sa Basahon sa Mga Hebreohanon, makaplagan nato kining halangdon nga Persona. Kinsa ang makasulti kanako kung unsa ang Iyang Ngalan? [Nagaingon ang kongregasyon, “Melquisedec.”—Ed.] Si Melquisedec. Karon, Kinsa man kining si Melquisedec? Siya ang sacerdote sa Dios nga Hataas Uyamut. Siya ang Hari sa Salem, nga mao ang Hari sa Jerusalem. Wala Siya’y amahan, o wala pud Siya’y inahan. Wala Siya’y panahon nga gipakatawo Siya, o magkaaduna man Siya og panahon nga mamatay Siya. Karon, nasayran nato nga siguradong ang ingon niana Eternal.

³⁰² Nasayran nato nga ang pulong *hangtud-sa-kahangturan* nagkahulugan og “usa ka gidugayon sa panahon.” Nahinumdoman pa ba ninyo kana? Usa ka gidugayon sa panahon, kini maoy hangtud-sa-kahangturan ug hangtud-sa-kahangturan. Ug ang hangtud-sa-kahangturan napamatud-an na, sa makadaghang higayon, sa Biblia isip nga “usa—usa ka gidugayon sa panahon.”

³⁰³ Pero, ang Eternidad, ug adunay usa ra ka matang sa Kinabuhing Eternal, nga nasayran nato. Husto ba kana? Ang Dios lang ang adunay Kinabuhing Eternal, Siya ra. Husto ba kana? Usa ra ka matang ang Kinabuhing Eternal. Walay ingon-anang pulong sama sa “Eternal nga silot.” Tungod kay, kung pagasilotan ka ngadto sa Eternidad, kinahanglan aduna ka’y Kinabuhing Eternal aron nga masilotan ka ngadto sa Walay Katapusan. Kinahanglan aduna ka’y Eter-. . . Ug kung aduna ka’y Kinabuhing Eternal, dili ka mahimong silotan, kita n’yo, kung ikaw Eternal. “Siya nga nagapatalinghug sa Akong mga Pulong, ug nagatoo Kaniya nga nagsugo Kanako, adunay Kinabuhing walay katapusan.” Husto ba kana? Kinabuhing Eternal, tungod kay nagatoo man ka. Bueno, kung aduna ka’y Kinabuhing Eternal, dili ka mahimong silotan, tungod aduna man ka’y Kinabuhing *Eternal*. Busa, kung ingon-ana, kung mag-antus ka didto sa impiyerno sa hangtud-sa-kahangturan ug hangtud-sa-kahangturan, kinahanglan aduna ka’y Kinabuhing

Eternal.

³⁰⁴ Pero, karon, nagatoo ako nga ang Biblia nagatudlo og usa ka literal nga nagdilaab nga impiyerno. Ginatudlo kana sa Biblia, nga ang mga sala ug mga kadautan pagasilotan, hangtud sa kahangturan ug hangtud sa kahangturan. Dili kana Eternidad, ha. Tingali magdugay man kana og napulo ka bilyon ka tuig. Tingali magdugay kini og gatus ka bilyon ka tuig, pero moabot sa punto nga kinahanglan kini nga moundang. Kay, ang tanan nga adunay sinugdanan, adunay katapusan. Kadtong mga butang nga walay sinugdanan, mao ang walay katapusan.

³⁰⁵ Nadumduman ba ninyo kana nga leksyon karon? Kung unsa nga gibalikan nato ug nakita nga ang tanan nga adunay sinugdanan gituis, kita n'yo, usa ka pagtuis gikan sa orihinal. Ug, sa katapusan, mibalik kini ngadto sa Eternidad. Ug dayon ang tibuk impiyerno, ang tanang pag-antus, ug ang tanang pahinumdom mahitungod sa ingon niana, mahanaw na sa Eternidad. Ang tanan nga nagsugod, matapos na.

³⁰⁶ Ug kining si Melquisedec dili mao si Jesus, tungod kay Dios man si Melquisedec. Ug kung unsa ba'y kalainan ni Jesus ug sa Dios, nga, si Jesus mao ang Tabernakulo nga gipuy-an sa Dios. Kita n'yo? Karon, si Melquisedec. Si Jesus parehong adunay amahan ug inahan. Ug kining Tawhana wala ma'y amahan o inahan. Adunay sinugdanan sa kinabuhi si Jesus ug aduna Siya'y katapusan sa kinabuhi. Kining Tawhana pud wala'y amahan, walay inahan, walay sinugdanan sa mga adlaw o katapusan man sa kinabuhi. Pero, Sila'y mao rang Persona. Mao nga, si Melquisedec ug si Jesus Usa ra; pero si Jesus mao ang yutan-ong lawas, nga natawo ug giumol nga mamahimong sala. Ang Mismong lawas sa Dios, ang Mismo Niyang anak, natawo ug giumol nga mamahimong sala, para wagtangan ang ikot gikan sa kamatayon, aron bayaran ang lukat, ug aron magdawat og mga anak nga lalaki ug mga anak nga babaye ngadto Kaniya. Nasabtan n'yo ba? Kana ang rason kung nganong aduna Siya'y—aduna Siya'y sinugdanan, aduna Siya'y katapusan.

³⁰⁷ Pero kining hingpit nga lawas, ingon nga panghandum, ingon nga—nga mao ang patinga sa atong pagkabanhaw, dili mapahanugotan sa Dios nga makakita og pagkadunot ang maong balaang lawas, tungod kay Siya Mismo ang nagbuhat niini. Ug nagpatungha niini, ug nagbanhaw niini, ug nagpahamutang niini sa Iyang tuong kamot.

³⁰⁸ Ug, karon, ang Balaang Espiritu nga maoy nagbanhaw niadtong lawas ania karon sa Iglesia. Dalaygon ang Ngalan sa Ginoo! Ug nagapakita sa mao rang mga milagro ug gahum. Ug sa umaabot nga adlaw kini nga Balaang Espiritu, nga anaa sulod sa Iglesia, magasinggit ug magakayab, ug pagadawaton ang kaugalingon niini ngadto niining pormang lawas nga nagalingkod didto sa tuong kamot sa Kahalangdon sa Dios, aron

sa pagpangaliya alang kanatong mga makasasala. ug tungod Niadto bug-os kitang giampingan gikan sa sala. Dili buut ipasabot nga dili na kita makasala; kondili giampingan kita gikan sa sala, sa Presensiya sa Dios. Tungod kay, aduna ma'y Dugoang halad nga atua tali kanako ug sa Dios, tali kanimo ug sa Dios. Mao kana ang rason nga miingon Siya, "Ang usa ka tawo nga gipanganak gikan sa Dios, dili magahimo'g pagpakasala, dili siya makasala." Tungod kay, kung natawo ka na pag-usab, ang mismong Balaang Espiritu nga nagpuyo niadtong Lawas nagapuyo usab sa sulod kanimo. Ug dili Kini makasala; kay nakapahamutang ang halad sa atubangan Kaniya. Dayon kung tinuyo mong magpakasala, nagapakita lang kana nga dili mahimong nakasulod ka nianang Lawas. Amen. Kana ang Ebanghelyo. Tan-awa Kini.

³⁰⁹ Busa, nakita n'yo, wala Niini ginaspak ang unsa mang mga Kasulatan. Ginapatakdo Niini ang mga Kasulatan. Kita n'yo? "Mahimong imposible kini para niadtong makausa nalamdagan na." Siguradong dinha kita makakuha og akong mga pangutana. Kay, mangutana lang kamo, gusto pud nato kana.

³¹⁰ Karon matikdi. "Dili na gayud mahimo alang niadtong nalamdagan na unta sa makausa, unya mitipas ug bag-ohon sila pag-usab ngadto sa paghinulsol, sa dihang gilansang nila pag-usab ang Anak sa Dios, ug ginahimo Siyang...ug ginapahimutang na usab Siya ngadto sa dayag nga kaulawan." Dili gyud nila kini mahimo.

³¹¹ Dayon moadto kamo sa Mga Hebreohanon 10, kon diin nagasulti Kini dinha, "Kay kung magpakasala kita sa tinuyo sa human ta madawat ang pag-ila sa Kamatuoran." Ug unsa man ang sala? Dili-pagtoo.

³¹² Kung kinabubut-on mong nakita ang Balaang Espiritu nga nagapamuhat sa mga butang nga sama sa gibuhat Niini dinhi mismo kaganinang buntag, ug nakita nga nabanhaw gyud diay si Cristo gikan sa mga patay, ug Siya'y buhi sa Iyang Iglesia ug sa taliwala sa Iyang katawhan, ug tinuyo mo Kining isalikway, imposible na gayud nga makaduol ka pa sa Dios, tungod kay gipasipalaan mo ang Espiritu Santo.

³¹³ Giingon ni Jesus ang mao rang mga butang, sa dihang ginabuhat Niya kaniadto ang mga milagro.

³¹⁴ Ang ingon nila, "Aba, Siya mao si Beelzebub. Usa Siya ka manghihimalad. Usa Siya ka yawa."

³¹⁵ Milingi si Jesus, ug miingon, "Pasayloon Ko kamo niana. Apan sa dihang moabot na ang Espiritu Santo ug buhaton ang ingon niini sa gihapon, ang pagsulti og usa ka pulong batok Niini dili na gayud mapasaylo sa niini nga kalibutan o bisan sa umalabot nga kalibutan." Tungod kay gitawag ninyo ang Espiritu sa Dios nga anaa Kaniya nga, "usa ka mahugaw nga espiritu."

316 Dayon, kung magpakasala kita sa tinuyo, kung magpakasala kita, tuyoon nga dili motoo. Dili nato kana mahimo pagkahuman nga madawat nato ang Kamatuoran, nga natawo na pag-usab; dili na kita makasala pa. Dili mahimong makasala ang usa ka makasasala sa dimapa- . . . Dili mahimong makasala ang usa ka Cristohanon og sala nga dimapasaylo. Dili niya mabuhat kana. Ang mga dautan ang maoy nagabuhat niana. Ang nagapatoo-too, dili ang magtotoo.

317 Ang mga Judio nga rabbi kaniadto, oh, abi nila kung unsa sila nga mga pormal, ug aduna kono sila og mga D.D. ug mga Ph.D. Abi nila nga sigurado na silang, nasulod na nila kini sa ilang bag, pero sila ang pinakalabing dautan sa mga makasasala. Oh, tingali sila'y. . . Wala ka'y maitudlo sa imong mahitungod sa—sa ilang kinabuhi. Sila'y limpyo, maayo'g moralidad, ug matarung, pag ingon niana ang hisgotan. Pero sila'y mga di-magtotoo.

318 Ug tan-awa ninyo ang pulong nga sala ug hibaloa kung unsa ang kahulugan niini. Ang buut ipasabot sa pulong nga *sala* maoy “dili-pagtoo.” Aduna lamang og duha ka pundok, kana, ang magtotoo o ang dili-magtotoo. Kana, ang tawong gipakamatarung o ang makasasala. Kana lang. Kung usa ikaw ka dili-magtotoo, usa ikaw ka makasasala; bisan unsa ka pa ka buutan, bisan unsa ka pa ka pirme magsimba, o bisan usa ka pa ka magwawali. Usa gihapon ikaw ka dili-magtotoo.

319 Ang mga Fariseo kaniadto mga magwawali man, ug sila mga dili-magtotoo, ug atua sa impiyerno karon tungod niana. Relihiyoso kaayo sila kaniadto, ug ingon ka diosnon, pero wala sila motoo Kaniya. Ug gitawag nila Siya nga “usa ka yawa,” ug milalis sa Iyang Pulong. Ug ang uban kanila miingon, “Kung ikaw mao man, kanaug ka sa krus. Magbuhat ka og milagro. Tan-awon namo nga ginabuhat mo kini.” Dunay mibunsa sa Iyang ulo, gamit ang usa ka kahoy, ug miingon, “Pagpanagna ug sultihi kami kung kinsa ang mihapak kanimo, ikaw nga propeta, ug motoo kami kanimo.” Nakita n'yo, mga dili-magtotoo! Nagpakaaron-ingnon lamang nga mga magtotoo sila, pero sila'y mga dili-magtotoo, mga wala nabag-o, mga wala pa nangahimulag, bisan sila mga balaan ug diosnon.

320 Hangtud karon, ingon niana sa gihapon karon ang nagakahitabo. Mga kalalaken-an ug mga kababayen-an nga seryoso kaayo'g mga nawong nga nagasimba, ug—ug masantosan kaayo kutob sa ilang mahimo, ug wala gayud nagapamakak, wala nagapangawat, ug nagapaningkamot gayud nga ikinabuhi ang ilang relihiyon kutob sa ilang mahimo. Pero, gawas lang nga usa sila ka magtotoo, malaglag gyud sila. Mao nga wala gyu'y ni tipik sa pagka-legalista diha sa Biblia. Sa Calvinismo. . . Grasya ang hinungdan nga namuhat ang Dios para kanimo, ug mga buhat usab ang imong ginabuhat ingon nga balus sa Dios. Bug-os kini sila nga magkalahi.

³²¹ Miundang ka man sa pagpamakak, miundang sa pagpanigarilyo, miundang sa pagpangawat, miundang sa pagpanapaw, miundang sa tanan, gibuhat man ang tanan, gituman ang mga sugo, ug mitambong sa panimbahon, nabautismohan pa kada Dominggo, miambit ka man og komunyon, naghugas og mga tiil sa mga balaan, gibuhat mo man ang tanan, nag-ayo sa mga may sakit, ug gibuhat ang tanang uban pa niining mga butang, gawas kung natawo ka sa Espiritu sa Dios, pinili, malaglag gyud ka. “Dili kini sa kabubut-on sa tawo o kaniya nga nagapaningkamot, kondili sa kalooy sa Dios.”

³²² Gipaningkamotan kaniadto ni Esau kutob sa mahimo niya nga mamahimong usa ka Cristohanon, ug dili niya kini mahimo. Gisulti sa Biblia nga mihilak siya sa hilabihan gayud, sa pagpangita og lugar nga makapaghinulsol, ug wala niya hingsaplagi kini. Kay sa wala pa gani siya matawo, gikondena na siya sa Dios, tungod kay kabalo na ang Dios nga usa siya ka mangil-ad nga tikasan diha sa iyang kasingkasing. Kabalo na niini ang Dios pinaagi sa pagkahibalo-nang-daan. Ang giingon Niya, “Gihigugma Ko si Jacob, ug gidumtan Ko si Esau.” Ug mora’g buotan pa gani si Esau. Mabilin siya sa balay, nga ginaatiman ang iyang tigulang nga amahan nga buta, ginapakaon niya ang mga baka, ug tanan na, usa ka buotan nga bata.

³²³ Ug batang mamamahon na man si Jacob, usa ka talawan nga tighimo-himo’g sugilanon. Ingon niana siya. Kinahanglan n’yong dawaton kana. Aminado ang Biblia, gisulti mismo kini. Siya ang ginasugo-sugo, ang nagabuhat sa tanantanan. Ug—ug, si mama, uban-uban siya kang mama kanunay. Pero, sa gihapon, si Jacob, bisan sa tanan niyang mga giagian, ug sa iyang babayen-ong mga gawi, aduna gihapon og dakung bili para kaniya ang katungod sa pagkapanganay. Kana ang pinakamahinungdanon.

³²⁴ Doble ka buotan si Esau kay kang Jacob. Kung hukman man nato siya sa karon, ingon nga miyembro sa atong iglesia, mahimong pilion ninyo si Esau, usa ka libo ka pilo, kung dili ninyo siya nailhan. Pero si Jacob ang gipili sa Dios.

³²⁵ Unsa kaha ang buhaton ninyo kang San Pablo, kung gusto niya nga mamahimong ministro? Usa ka gamay’ng, Judio nga agilahon nag ilong, ug nagkibot-kibot ang baba, nga pirme na lang makiglalis, ug unsa nga gub-on pa niya ang Iglesia, nga buhaton kono niya ang tanan. Hunahunaon ninyo siguro nga nakahimo siya og dili-mapasaylong sala, pero ang ingon sa Dios, “Siya’y Akong alagad.”

³²⁶ Nagakuha ang Dios og mga tawo ug ginabag-o sila, dili nga ang maong mga tawo ang mokuha sa Dios ug dayon mabag-o. Nagakuha ang Dios og tawo ug ginabag-o siya. Dili kini sa kung

unsa ang imong ginabuhay, kung unsa ang gusto mo, kung unsa ang gihunahuna mo. Kini maoy sa kung unsa ang ginabuhay sa Dios. Mao gyud kana. Ug mao kana ang estorya niini.

³²⁷ Karon, kining halangdon nga si Melquisedec, nindot kaayo kini nga estorya mahitungod Kaniya dinhi! Gusto natong magbasa pa og diyutay, para mahimong . . . kinahanglan natong dalion sa paghisgot kini. Pagasugdan nato dinhi sa usa ka bahin sa Kasulatan, ug ato sugdan sa ika-15 nga bersekulo.

Ug kini milabi pa . . . nga dayag: nga adunay . . . kung sumala sa pagkasama ni Melquisedec may mobangon nga laing sacerdote.

³²⁸ Karon, si Melquisedec usa ka Sacerdote. Siya ba? Ania kung unsa Siya kaniadto. Nahibaloan nato nga ang Dios, sa sinugdan, maoy usa ka dakung Tuboran sa Espiritu. Husto ba kana? Wala Siya'y lugar nga natawhan. Wala Siya'y lugar nga gikamatyan. Wala Siya'y sinugdanan sa mga adlaw. Wala Siya'y katapusan sa mga tuig. Basta Siya'y ingon ka Eternal sama nga Eternal pud ang Eternidad. Wala gayud Siya matawo. Wala gayud Siya mamatay.

³²⁹ Ug kaniadto, nahibaloan nato nga, aduna Siya'y pito ka sarisari nga Espiritu. Husto ba kana? Ang giingon sa Biblia, diha sa Pinadayag, nga, "Ang pito ka Espiritu sa atubangan sa Trono sa Dios." Husto ba kana? Ang pito, ka nagkalainlain, pito ka Espiritu. Nahibaloan nato, nga aduna usab og pito ka kolor. Adunay pito ka kapanahonan sa iglesia. Oh, nagakatakdo kini. Ang pito kahingpitan, ug ang Dios kahingpitan. Ug ang pito ka Espiritu, ug hingpit kadto nga mga Espiritu. Ang una mao ang kolor nga pula; hingpit nga gugma, katubsanan. Ug sa unsa mang paagi, kung aduna pa kita og oras, hisgotan nato ang maong mga kolor ug ipakita nga ang matag usa nianang kolor nagarepresentar sa kaputli sa Dios. Amen. Kana nga mga kolor, adunay pito ka natural nga mga kolor. Kana nga mga kolor nagarepresentar sa kaputli sa Dios. Ug ang . . . Kana nga mga kolor nagarepresentar sa mga motibo sa Dios, sa panghunahuna sa Dios. Kanang pito ka kolor, ginarepresentar nila ang pito ka kapanahonan sa iglesia, pito ka bitoon, pito ka manulonda. Sa tibuok Kasulatan, pito ka ministro, pito ka mensahero, pito ka mensahe, ang tanan sa ihap nga pito. Pito ka adlaw. Unom ka adlaw, ug ang ikapito mao ang igpapahulay; hingpit, kumpleto. Oh, pagkamaanindot niini, kung aduna lamang kita og oras para batbaton kini ug hisgotan kini, kana nga mga kolor!

³³⁰ Ipananglitan nato ang kolor nga pula. Hisgotan nato ang unang kolor, ang pula. Unsa ba ang pula? Ang pula usa ka ilhanan nga adunay peligro. Ang pula usa usab ka ilhanan sa katubsanan. Ug tan-awa ninyo ang pula gamit ang usa pa ka pula, unsa ang resulta nga kolor? Puti. Husto kana. Busa sa dihang gipaagay kaniadto ang pulang Dugo, para tabonan ang

pulang sala, ang Dios, sa pagtan-aw Niya pinaagi sa pulang Dugo, pagtan-aw Niya sa pulang sala, nahimo kini nga puti. Dili mahimong makasala ang magtotoo. Siguradong dili gayud. Ang Binhi sa Dios, ang mga panalangin sa Dios, nagpabilin man diha kaniya. Wala na'y uban pa nga nakita ang Dios kondili ang Dugo sa Iyang Kaugalingong Anak. Bisan unsa pa ang anaa sa Iyang Iglesia, unsa pa man kini, dili na kana makita sa Dios, tungod nga nagapangaliya si Jesus, sa kanunay, ang Labaw'ng Sacerdote. Wala na'y paagi para sa usa ka magtotoo nga makasala, sa dihang anaa na dinha ang mao nga Halad para kaniya, sama niana. Siguradong dili gyud.

³³¹ Ug karon kung moingon ka, “Bueno, nagahatag diay kana kanako og maayong kahigayonan...” Kung ingon-ana nagapakita lang nga wala ka sa husto.

³³² Pasalamatan ninyo Kini. Higugmaon ninyo Kini, kung kamo matuod gayud nga Cristohanon, hangtud nga mahadlok ka nang makasala nga dili na ninyo kini mahimo nga buhaton pa. “Kay ang Binhi sa Dios nagapabilin diha kaniya, ug siya dili makasala.” Ang ingon sa Biblia, “Sa makausa nga nahinloan na sa Dugo ni Jesus, wala na ang pangibog sa kasal-anan.” Kung aduna ka pa'y pangibog, ang imong kasingkasing dili pa matarung sa Dios.

³³³ Karon, makabuhat ka og sayup, pero wala mo kini gituyo nga buhaton. Kita n'yo? Ikaw—nalit-ag ka lang, ug sa bisan unsa mang butang nga nalit-ag ka, o nakabuhat ka og usa ka butang nga wala mo gituyo nga buhaton, dili pa kana sala, maghinulsol ka man sa oras nga makita mo nga nasayop ka. Molingi man ka sa gilayon ug moingon, “Wala nako tuyoa... wala nako damha kana.” Ingon niana ang isulti mo, sa tibuok mong kinabuhi. Dili gusto sa maong tawo nga mamaingon niana, mao kana ang hinungdan kon nganong pagkaburong nato ug nahugno sa kangitngitan, dinhi mismo sa yuta, samtang aduna ma'y Dugo nga pangtabon-sa-sala alang kanato, sa tanang panahon, aron kita matabonan. Tungod, sa una pa lang nga sayup nga atong...

³³⁴ Karon, anaa na usab kanang ideya ninyo nga pagka-legalista. “Oh, kabalo ka ba kung unsa? Gibalaan na man kana nga babaye. Pero, dalaygon ang Dios, nakahimo baya siya og sayup. Kabalo na ko nga ni-backslide na siya.” Sayup kana. Wala siya ni-backslide. Nasayup lang siya. Kung tinuyo niya nga gibuhat kana, nan nagpasabot nga dili siya husto, sa sugod pa lang.

³³⁵ Kung wala niya tuyoa nga mabuhat kana, ug moanha siya atubangan sa balaang Iglesia sa Dios ug isugid kini, ug moingon, “Nasayup ako, ug pasayloon ninyo ako,” obligado kamo nga pasayloon siya. Kung wala ninyo siya gipasaylo diha sa inyong kasingkasing, nan mas kamo diay ang kinahanglan nga moduol ngadto sa altar. Tinuod. Ingon niana ang tinuod nga

pagkabalaan sa iglesia. Ingon niana ang putli nga pagkabalaan, ang pagkabalaan nga dili sa inyo, kondili iya ni Cristo.

³³⁶ Wala ako'y pagkabalaan para ikapresentar ngadto Kaniya. Kondili nagasalig lamang ako sa Iyahang pagkabalaan, oh, sa Iyang grasya ug aduna ako niini sulod sa akong kasingkasing. Dili ako takus niini, wala ko'y nabuhat para mahimong takus para niini, pero tungod sa grasya gitawag Niya ako ug gidapit ako nga moduol. Ug milantaw ako Kaniya, ug gitangtang Niya ang pagpangibog gikan kanako. Nagapamuhat ako og linibo ka mga sayup sa matag bulan, matag tuig. Sigurado, nagakasayup ako. Pero sa dihang makita nako nga nasayup ako, moingon ako, "Ginoo, wala nako tuyoa nga buhaton kadto, nahibalo Ka sa akong kasingkasing. Wala nako tuyoa nga buhaton kadto. Nalit-ag lang ako niadto. Wala nako tuyoa nga buhaton kadto. Pasayloa ako, Ginoo."

³³⁷ Kung nakabuhat man ako og sayup ngadto sa akong igsoon, moingon ko, "Igsoon, pasayloa ako. Wala nako tuyoa nga buhaton kana. Siguradong, nahibalo ang Dios sa akong kasingkasing."

³³⁸ Oh, mao kana. Ingon niana ang Halad nga Dugo. Ingon niana ang gahum sa Ebanghelyo, ingon niana ang balaang Iglesia nga nagapadayon. Dili tungod sa kung unsa nga imong nabuhat; butang kini nga walay labot ang bisan unsa man nga nabuhat mo. Ingon niana ang Pangbayad-sa-sala.

³³⁹ Karon, kining si Melquisedec, sa dihang mitungha Siya.

³⁴⁰ Gusto kong isulti sa inyo ang usa pa ka butang. Nakakuha na ba mo og—og usa kabuok nga bildo nga may tulo ka kanto? Pagkuha mo og usa kabuok nga bildo nga dunay tulo ka kanto, ug ibulad n'yo kini aron masilawan sa adlaw, magpatungha kana og pito ka lunsay'ng kolor. Magpatungha og balangaw ang usa ka bildo nga dunay tulo ka kanto. Eksakto gyud kana. Karon, kung duna pa kita og oras, hisgotan nato kana. Nagahatud og kahingpitan ang ihap nga tulo: Amahan, Anak, Espiritu Santo; pagpakamatarung, pagpakabalaan, ang bautismo sa Espiritu Santo. Tan-awa. Nagaabot ang kahingpitan sa ihap nga tulo. Ang Dios, nga anaa ibabaw sa tawo; ang Dios, diha sa Tawong gitawag nga Jesus; diha sa Iglesia. Dayon ang kahingpitan na.

³⁴¹ Nakasala ang tawo, samtang *anaa* pa ang Dios diha sa usa ka Haliging Kalayo. Ang Dios. . . Ang tawo nakasala, diay, sa atubangan sa Dios, samtang atua pa sa Haliging Kalayo ang Dios, tungod kay ang tawo mahugaw pa man nga binuhat kaniadto, dugo sa mananap ang atua pa sa Iyang atubangan.

³⁴² Dayon miabot ang Cordero sa Dios, ang ikaduhang hingpit nga ang-ang sa Dios; sa mao rang Dios, pero lahi na usab nga opisina. Ug dayon kini nga Dios nga anaa sa. . . nga anaa kang Cristo, mao ang mao ra sa gihapon nga Dios nga atua kaniadto sa Haliging Kalayo. Ug ang mao rang Dios nga nahimong unod

ug mipuyo ipon kanato. Ug dayon gibiyabiay Siya sa tawo, dili pa man sila mapapanubag niadto. Wala pa man naula ang Dugo niadtong higayona. Husto kana. Ang ingon ni Jesus, “Pasayloon Ko kamo.”

³⁴³ Pero human niadto ang mao rang Usa nga nahimong tawo, nahimong Haliging Kalayo pag-usab. “Naggikan Ako sa Dios. Mobalik Ako sa Dios.” Nakita nato dinhi nga natagbo Siya ni Pablo, sa dalan padulong sa Damasco, ang mao rang Haliging Kalayo. Nakita nato nga natagbo pud Siya ni Pedro didto sa bilanggoan, ang mao rang Haliging Kalayo. Sigurado. Ug makita nato Siya sa karong panahon, sa atong taliwala, ang mao rang Haliging Kalayo.

³⁴⁴ Pero ang kahingpitan miabot sa punto nga, ang Tawo nga atua sa tunga...Karon, kung aduna ma’y Judio dinhi, o si kinsa man nga nakasabot sa Daang Tugon. Pamatud-i kini, sige ipakita ko kanimo. Wala ko man gud nadala ang Daang Tugon, karon. Kini ra ang—ang Bag-ong Tugon. Pero diha sa paghalad sa tinapay-nga-binutang-sa-atubangan-sa-Dios nga atua niadtong platong kosher, sa paghalad sa mga Judio sa panahon sa paghinlo sa mga tabernakulo; pangutan-a ninyo ang si bisan kinsang Judio; sa kadtong tulo ka buok nga tinapay, ang atua sa tunga maoy gipikas-pikas. Si Cristo kana. Ang atua sa tunga nga tinapay gipikas-pikas; si Cristo, ang anaa-sa-tunga. Gipakita lang nga kinahanglan aduna gyu’y pagpikas-pikas, sa usa ka dapit, para sa katubsanan. Ug kadtong usa ka buok nga tinapay maoy gipakaingon nga katubsanan, sa tinapay nga kosher.

³⁴⁵ Ug ania Siya karon. Ug niining gabhiona, sa pag-ambit nato og komunyong, ginapikas-pikas nato ang maong tinapay nga kosher, tungod nga kini ang lawas ni Cristo. Ug gipikas-pikas Siya didto sa Kalbaryo, para mamahimong usa ka Pagpasig-uling halad tungod sa atong mga sala, aron nga pinaagi sa Iyang pagkamatarung mamahimo kitang Iyang pagkamatarung. Tungod kay, nahimo Siyang atong kasal-anan, para kita mamahimong Iyang pagkamatarung. Igsoon, tuman nga grasya kana. Sa walay pagduhaduha. Walay ubang paagi, unsa mang uban pa nga paagi para mahatagan mo kini og katarungan.

³⁴⁶ Karon, kining si Melquisedec, kining halangdon nga Persona nga natagbo didto sa dalan, nagbayad siya, nagbayad si Abraham og mga ikapulo ngadto Kaniya. Pagkahalangdon Siya nga Persona! Karon matikdi, sa kadali.

Nga gihimo, dili sumala sa balaod sa...lawasnon
mga kasugoan,...

³⁴⁷ Karon nakita n’yo na kanang legalistang balaod? Ang giingon sa balaod, “Dili ka magpatay. Dili ka manapaw. Dili ka mangawat.”

³⁴⁸ Milingi kaniadto si Jesus, og miingon, “Nagsulti sila nga sa karaang panahon, ‘Dili ka magpatay,’ pero ginasulti Ko nga ang masuko sa iyang igsoon, sa walay hinungdan, nakapatay na. Gisulti nila, sa karaang panahon, ‘Dili ka manapaw,’ Apan Ako nagaingon kaninyo, nga ang si kinsa man nga nagatan-aw sa usa ka babaye sa pagkaibog kaniya, nakapanapaw na sa iyang kasingkasing uban sa maong babaye.” Tan-awa. Dinha pa lang gitudloan na ang mga kababayen-an kung unsaon sa pagbisti, kung unsaon pagbuhat sa husto. Sa pagbisti n’yo og sayup, ug nagpahinungdan nga ang mga kalalaken-an magtan-aw sa inyo sa sayup nga paagi, sad-an ikaw nga nagabuhat og pagpanapaw, nga pareho ra nga ginabuhat n’yo ang mao mismong buhat. Ingon niana ang giingon ni Jesus.

³⁴⁹ Ug kamong mga tawo nga ang kainit sa ulo sama sa hait-sa-gabas, nga kanunay na lang gasinghag sa uban, nga dili man lang makapugong, ug kung unsa pa. Magbantay kamo. Sad-an gyud kamo kung magsulti kamo og batok sa inyong igsoon og pulong nga dili maayo, nga dili tarung, mag-adto sa kung asa ug mangdaot. Dili kamo kinahanglan magtion og kutsilyo sa likod sa usa ka tawo para patyon siya. Gub-on mo lang ang iyang pagkatawo ug gipatay mo na siya, gipatay mo na ang iyang impluwensiya. Ang pagsulti og batok sa inyong pastor dinhi, ang pagsulti og bisan unsa nga dili maayo mahitungod kaniya, pareho ra na nga gipusil mo siya. Ang pagsulti og dili maayo mahitungod kaniya, bueno, pagapatyon niana ang impluwensiya niya sa mga tawo ug mga butang nga sama niana, ug sad-an ka sa pagbuhat niana. Ingon niana ang gisulti ni Jesus.

³⁵⁰ Karon, paminaw mo dinhi, kung unsa—kung unsa ang ginapunto dinhi ni Pablo. Gusto ko gayud kining daang Biblia. Ginatul-id ka man gud Niini. Tan-awa, oh, tan-awa gani ninyo dinhi. Karon, samtang basahon nato ang ikakator-... “Dayag gayud... kay dayag gayud nga ang atong Ginoo natawo gikan kang Ju-...” Aysa ha, nagatoo ko nga aduna ko’y usa pa ka bersekulo dinhi nga pagabasahon. Dili nia, dinhi diay sa ika-16.

Nga ginahimo, dili sumala sa balaod... lawasnon nga mga kasugaoan,...

³⁵¹ May pagka-legalista kana, nakita n’yo. “Oh, igsoon, ako—dili nako unta. Dili nako unta. Kabalo man ko, pero akong...” Dili ingon niana kini. Gugma ang nagapahimo niana.

³⁵² Nahisgotan na nato kini! Ingon ko, “Kung misulti ako sa akong... sa akong asawa, ‘Oh, bueno, ako—ako—gusto ko unta magkaaduna og duha ka asawa. Gusto kong makigpuyo-puyo sa *niining* usa, og buhaton pud sa *niining* usa didto. Pero, kung buhaton nako kana, bulagan gyud ako sa akong asawa, ug ang akong mga bata mapaingon sa... Madaut ang akong ministryo.” Ikaw’ng mahugaw, dunot nga hipokrito. Tinuod

kana. Wala diay ka nahigugma kaniya, sa sugod pa lang. Eksakto gyud kana.

³⁵³ Kung nahigugma ka sa imong asawa, wala na'y balaod-balaod bahin niini. Higugmaon mo siya, bisan pa man, ug magpabilin ka nga matinuoron kaniya. Eksakto gyud kana. Ug kamong mga kababayen-an ingon niana pud ang buhaton ninyo ngadto sa inyong bana. Husto kana.

³⁵⁴ Usahay ang mga kababayen-an nagakahimong, o . . .

³⁵⁵ Pag ang lalaki makakita og usa ka babayeng Jezebel nga nakapangmeyk-up og ayo, kabalo na mo, ug—ug dayon adto-adtoan mo na, mahulog kaniya; tingali aduna pa gani ka og buutang asawa. Ug dayon imong tawagon ang imong kaugalingon nga usa ka Cristohanon. Makauulaw ka. Kinahanglan ka nga mapatumar na usab og tambal pang-altar. Husto kana.

³⁵⁶ Ug ang uban kaninyo—ug ang uban pud kaninyong mga kababayen-an palantaw-lantaw pa kamo ngadto sa ubang mga lalake nga pinahapsay ang buhok, nga gipahiran sa Vaseline para . . . mapanganga kamo Ug dayon inyong . . .

³⁵⁷ May usa ka dalaga dinhi, dili pa lang dugay. . . Dili kini usa ka kumedyang, tungod kay dili ko buut isulti kini ingon nga kumedyang. Pero kabalo ang mga tawo nga dili kini usa ka lugar para sa pagkumedyang. Pero kining dalaga dinhi, siya . . . Duna ma'y mga buotan nga mga batan-on dinhi, mga batan-ong Cristohanon. Dugay na nga panahon, sa dihang nagpastor pa ako dinhi, kaniadto nagapahigayon kami kaniadto og pagtuon nga para lang sa mga batan-ong kalalaken-an. Ug sa pagka-Dominggo sa hapon mowali na sab ko sa mga batan-ong babaye, mahitungod sa seksuwalidad ug uban pa nga mga butang. Dayon pagkasunod Dominggo sa hapon, mowali na pud ko ngadto sa mga batan-ong kalalaken-an, ug naningkamot nga tul-iron ang ingon niadtong mga butang.

³⁵⁸ Aduna na diay usa ka dalaga nga nagsugod na'g uban-uban sa usa ka salbahis nga lalaki, dinhi sa lungsod, nga gapanigarilyo ug may dala nga gamay'ng botilya sa bino sa iyang bulsa. Ug nagamaneho siya og roadster nga sakyanan dinhi sa lungsod. Dili nako masabtan kung unsa ang nakita niadtong dalaga sa niining batan-ong lalaki. Wala gani kini interes nga mosimba. Molingkod lang kini didto sa gawas. Ihatud kadtong dalaga dinhi sa simbahan, ug dayon maglingkod lang sa gawas, sa iyang saksayan, ug maghulat, dili man lang mosulod sa simbahan. Gisultihan nako ang dalaga usa niana ka adlaw. Didto siya nagapuyo sa New Albany. Ingon ko, "May gusto unta akong ipangutana sa imo, inday. Unsa ba gyu'y nakita mo sa nianang lalaki?" Ingon ko, "Una sa tanan, ayaw na ayaw niya kining relihiyon nga ikaw—aduna ka. Ginasalikway niya ang imong Cristo. Dili gyud siya mamahimong maayong bana para kanimo.

Himoon ka lang niya nga miserable, sa tibuok mong kinabuhi.” Ug ingon ko, “Bueno, may buutan man dinhing mga batan-on nga Cristohanon nga mahimo kang kuyogan. Ug supak kaayo ang imong papa ug mama sa paghunahuna pa lang nga mokuyog-kuyog ka niini, pero mikuyog ka gihapon, ug gihunahuna mong, ‘Dise-sais ka na og daku na.’”

³⁵⁹ Misugod na siya og pagpangmeyk-up ug migawas-gawas na nga walay pananghid, ug wala magdugay, nagaadto na siya sa mga balay-inuman nga may mga sayawan. Mipanaw na siya ngadto sa Eternidad. Pero, sa wala pa kadto, mitambong siya dinhi kaniadto. Ug kabalo ba mo kung unsay pasumangil nga tubag sa ako niadtong dalaga kaniadto, kung ngano daw niya gihigugma kadtung batan-ong lalaki? Ingon niya, “Nindot man gud kaayo ang mga tiil niya, ug humot pud kaayo siya.” Mahunahuna kaha ninyo kana? Nagtago sa likod nianang pahumot, mga bayot lang ang ingon niana, dili lalaki.

³⁶⁰ “Tan-awa,” Ingon ko, “igsoon, mas gustohon ko pa nga mokuyog sa usa ka batan-ong Cristohanon nga ang mga tiil mora og mga panghakot sa graba ug ang baho sama sa polecat, kung siya na ma’y sigurado gyud nga Cristohanon.” Husto kana. Tinuod. Oo.

³⁶¹ Ang pasumangil niya, “Nindot man gud kaayo ang mga tiil, ug humot kaayo siya.” Ang maong batan-ong promotor sa balay-inuman, sa kaulahian gidaot niya ang kinabuhi sa maong igsoong babaye. Makauulaw kini, kaulawan gyud.

³⁶² Halangdon nga butang ang pag-minyo, pero kinahanglan lang nga ang mosulod niini mainampoon ug matinahuron. Ug ang tinuod mo nga gugma para sa usa ka babaye ang magbugkos sa inyong duha hangtud sa hangtud. “Unsa may imong pagabugkoson sa yuta, pagabugkoson Ko sa Langit.” Sa paglakaw ninyo didto sa kadalanan, mahimong tigulang na siya ug ubanon ug nangunot na, pero kanang mao rang gugma nga aduna ka para sa iya niadtong dalaga pa siya, niadtong maanyag pa siya nga babaye, anaa pa gihapon kana kanimo.

³⁶³ Tingali’g bako ka na, upaw na, ug nangunot na ang dagway ug kung unsa pa, pero higugmaon ka gihapon sa nianang babaye sama niadtong malapad pa ang imong abaga ug kulot ang buhok, kung tinuod gyud nga iya kini sa Dios. Kay nagalaum kamo alang nianang panahon pagnakatabok na kamo sa maong suba didto, sa dihang maibalik na kamo, ingon nga mga batan-on na usab nga mga lalake ug babaye, aron magkinabuhi nga magkauban hangtud sa kahangturan. Kana mao ang Eternal nga saad sa Dios. Gisulti Niya og buhaton gyud Niya kini. Siya, dili lamang kana, moadto kita sa nianang hilisgotan sa pipila ka minuto, gipanumpaon Niya nga buhaton gyud Niya kini.

³⁶⁴ Paminawa ninyo kini, sa pagpadayon nato.

Nga ginahimo, . . . sumala sa balaod . . . lawasnon nga mga kasugoan, kondili sumala sa gahum sa . . . kinabuhi nga walay katapusan.

³⁶⁵ Karon paspason nato ang pagbasa niini, para makaadto na kita dinha.

Kay ginapamatud-an mahitungod kaniya, Ikaw sacerdote sa walay katapusan sumala sa laray ni Melquisedec.

Basta nga nanginahanglan pa og sacerdote, magapabilin Siya nga Sacerdote.

Kay dunay dayag nga pagwagtang sa nahauna nga mga sugo tungod sa . . . kahuyang ug pagkawalay kapuslanan niini.

Kay walay bisan unsa nga gihingpit, sa kasugoan, . . .

³⁶⁶ Dili n'yo gayud mahimo, bisan unsa pa'y buhaton ninyo. Moundang man kamo sa pag-inum-inum, moundang sa pagpanigarilyo, moundang sa pagsulti'g mga bakak, magsimba ug maningkamot nga buhaton ang *ingon niini* ug maningkamot nga buhaton ang *ingon niana*, karnal gihapon kamo. Balaod lang kana. Walay bisan unsa man nga ginahingpit sa balaod. Apan unsa ang nagahingpit? Si Cristo. Himaya! Moundang man ako sa pagpamakak, moundang man sa pagpangawat, moundang sa pagpanapaw, moundang sa pagmama og tabako, moundang sa tanan na nianang mga butang, ug karnal pa gihapon ako. Wala kini ginadawat sa Dios, tungod kay wala ako'y unsa man nga maihalad Kaniya isip halad pagpasig-uli.

³⁶⁷ Pero sa mismong higayon nga ipandong nako ang akong mga kamot sa balaang ulo ni Ginoong Jesus, ug moingon, "Ginoo, wala gyu'y maayo kanako. Mahimo Mo ba akong dawaton ingon nga Imong alagad?" ug panason dayon sa Dios ang akong sala, makatindog na akong hingpit sa panan-aw sa Dios. Husto kana. Ngano man? Wala na ako nagatindog sa kaugalingon ko nga merito. Nagatindog na ako sa Iyahang merito. Ug Iya kitang gihingpit, pinaagi sa pag-antus Niya ug sa Iyang Dugo.

³⁶⁸ Nakita ko nga oras na diay para magtapos. Pero gusto kong humanon ang pagbasa niini kung mahimo, paspason ko na lang.

. . . tungod sa kahuyang ug pagkawalay kapuslanan niini.

Kay walay bisan unsa nga gihingpit, sa kasugoan, ug ang pagpasulod tungod niini sa labing maayo nga paglaum; (Unsa man ang mas maayong paglaum? Si Cristo.) nga pinaagi niini mahiduol kita sa Dios.

³⁶⁹ Ngano man? Kay bisan pa sa tanan natong pagkabuutan, ug bisan pa sa tanan natong pagkamaayo, ug sa tanan natong pagkabuutan, mga karnal sa gihapon kita. Pero pag-anaa na kita sa Presensya sa Dios, nga may pag-ila nga dili gyud kita

takus sa pagtindog dinha, kondili pinaagi lamang sa katakus ni Jesus Cristo, kung ingon-ana makaduol na kita sa Dios, pinaagi sa katakus sa Iyang Anak. “Ginoo, nagaduol ako sa Imo, uban ang inosenteng kasingkasing. Sa Ngalan sa Imong Anak nga si Jesus, kung mahimo dawata ako.” Oh, igsoon, nagaduol ka na kung ingon-ana pinaagi sa usa ka buhing paagi.

³⁷⁰ Dili nga, “Ginoo, kabalo Ka nga miundang na ako sa pag-inum-inum. Kabalo Ka nga ginatrato na nako sa husto ang akong asawa. Kabalo Ka nga ginabuhat ko ang *ingon niini*. Ginabuhat ko ang *ingon niana*.” Wala gyud ka’y unsa man nga ikahalad.

³⁷¹ “Kay ang balaod nga iya sa karnal nga mga kasugoan wala gyu’y mahimo kondili ang magdala lamang og usa pa ka bag-ong paglaum. Kana nga paglaum mao si Cristo, nga anaa kanato ingon nga angkla sa atong kalag, malig-on ug sigurado.” Tan-awa.

Ug sanglit kay kini dili sa walay pagpanumpa siya . . .

Pulingalan, kung matikdan ninyo dinhi, naka-italiko ang mga letra.

. . . siya gihimo nga sacerdote:

Dili lamang usa ka sacerdote, kondili gihimo Siya nga Sacerdote pinaagi sa panumpa. Dili nga . . .

³⁷² Karon matikdi ninyo. Hisgotan na nato ang uban pa dinhi mahitungod sa pagkasacerdote.

(Kay sa pagkatimatuod silang mga sacerdote, ang mga Levitico, anaa sa pagkamatarung, matarung, matinud-anon nga mga lalake, sila gipanaghimo nga mga sacerdote sa walay panumpa; . . .)

³⁷³ Miingon ang Dios, “Sama sa laray—sama sa laray ni Aaron, nga gihimo Niya nga sacerdote ang mga niini.” Ilang gipanunod ang pagkasacerdote sa tanang henerasyon nga miagi. Nagaeskuwela sila sa tulonghaan ug ginatun-an ang pagkamagwawali ug uban pa. Gipanunod nila kini. Busa gihimo sila sa Dios nga mga sacerdote nga ingon niana. Gipanghimo nila ang ilang mga kaugalingon nga mga sacerdote, pinaagi sa ilang pag-eskuwela, pinaagi sa ilang panulundon, ug uban pa. “Pero kini nga Persona gihimo nga Sacerdote pinaagi sa panumpa nga gipanumpa sa Dios.” Pagpaminaw og maayo karon.

(. . . gipanaghimo nga mga sacerdote sa walay panumpa; apan siya sa may panumpa tungod niadtong nag-ingon mahitungod kaniya, Ang Ginoo nanumpa ug dili magbasul, amen, Ikaw sacerdote sa walay katapusan sumala sa laray ni Melquisedec:)

Sa ingon usab si Jesus nahimong kalig-onan sa usa ka labing maayong tugon.

Karon dalion na nato.

Ug sila gayud nangahimong mga sacerdote nga daghan kaayo, kay tungod sa kamatayon ginapugngan sila sa pagpadayon:

Linibo ka linibo, nga mga sacerdote, tungod kay sila wala na'y lain kondili kamatayon lang ug kamatayon ug mga kaluyahon, ug kamatayon ug kamatayon ug kamatayon.

³⁷⁴ Pero matikdi ninyo Siya.

Apan kini nga tawo, (unsa nga Tawo?) si Jesus, tungod kay siya nagapadayon sa walay katapusan, nagabaton sa iyang pagkasacerdote nga walay pagkabalhin. Diin ang mga . . .

Busa usab siya arang makaluwas kanila sa tuman; bisan unsa pa ka halayo, unsa pa ka ubos, unsa pa ka halayo, Siya arang makaluwas sa tuman; kanila nga nanagduol ngadto sa Dios pinaagi kaniya, . . .

Dili pinaagi sa . . . sa inyong pagkamatarung; kondili sa inyong pagsugid. Kita n'yo?

. . . nga nanagduol sa Dios pinaagi kaniya, sanglit siya buhi sa gihapon aron sa pagpangamuyo alang kanila.

Atua Siya mismo, sa tanang panahon, nga nagapangaliya.

Kay ang mao nga labawng sacerdote nahiangay kanato, nga balaan, walay sala, walay buling, nahimulag gikan sa mga makasasala, ug gihimong usa ka Labawng Sacerdote sa Langit;

³⁷⁵ Tan-awa kana. Karon, kung paningkamotan kong irepresentar ang kaugalingon kong kaso, mapildi gyud ako. Kung paningkamotan kong irepresentar, moingon ko, "Bueno, ang papa nako usa man ka buutan nga tawo. Usa ka magwawali ang akong papa. Bueno, halos sa simbahan na gani ko nagpuyo." Pildi ra gihapon ko. Pero kini nga Tawo mao ang Tawong hingpit, si Cristo. Nagalingkod Siya didto ug ginahalad nga walang hunong ang Iyang Dugo para sa akong mga kasal-anan. Tan-awa.

Nga wala nanginahanglan sa adlaw-adlaw, nga sama niadtong . . . mga sacerdote, sa paghalad sa mga halad, una sa tanan alang sa iyang kaugalingong mga sala, ug unya alang sa mga sala sa mga tawo: kay kini iyang gibuhat sa makausa ra sa wala nay pagsublisubli, sa paghalad niya sa iyang kaugalingon.

³⁷⁶ Karon matikdi ang katapusang bersekulo.

Kay ang kasugoan nagatudlo og mga tawo nga may mga kaluyahon ingon nga mga labawng sacerdote; . . .

³⁷⁷ Ingon niana ang balaod, ang ginabuhat, sa karnal nga balaod. Karon, nanghinaut ko nga duna pa unta ko og duha ka

oras dinhi. Sa ingon niana gihapon nga paagi nga ginabuhat sa balaod nga mamahimong mga magwawali ang mga kalalaken-an. Husto kana.

³⁷⁸ Aba, moingon sila, “Bueno, dunay kasinatian sa seminario kini nga tawo.” Dili gyud nako ibaylo ang gamay kong Langitnon nga kasinatian bisan sa tanan pang mga seminario sa kalibutan.

³⁷⁹ “Aba, gipa-edukar namo kini nga tawo. Siya’y—siya’y personal mismo nga gipili. Nagmalampuson siya sa kaugalingon niya mismong paningkamot.” Dili ko gusto ang ingon niana nga klase. Ang gusto nako kanang milampus tungod ra gyud sa Dios. Kita n’yo? Kita n’yo?

³⁸⁰ Pero ang balaod nagahimo sa gihapon og mga sacerdote. Ang balaod nagahimo sa gihapon og mga magwawali. Ang—ang iglesiang Baptist, nagapa-graduwar og mga magwawali; dinaghan nga mga magwawali, aduna sila’y makinarya nga nagapa-graduwar kanila. Aduna pud og ingon niana ang mga Methodist. Adunay ingon niana ang mga Baptist. Ang mga Presbyterian, Nazarene, Pilgrim Holiness, mga Pentecostal, nagapa-graduwar sila og mga magwawali sa ingon ka paspas nga mahimo nila, sama sa usa ka dakung sistema, dakung makinarya. Magtindog ang mga niini didto nga mora’g. . .

³⁸¹ Kanunay ko na kini ginasulti, “ako—naluoy gyud ako sa usa ka manok nga gikan sa incubator.” Abi ninyo, ang usa ka manok nga napusa ilalum sa usa ka incubator, wala gyud siya napusa sa husto. Wala gyud. Ang himungaan unta maoy magpapusa sa manok. Pero ang manok nga gikan sa incubator, sa pagkapusa niya, siya mag “piyak, piyak, piyak,” ug walay mama nga maduolan. Kita n’yo? Wala siya kabalo kung unsa ang mama. Husto kana. Mopiyak-piyak siya para sa usa ka mama, pero wala man siya’y mama.

³⁸² Pero ang piso nga napusa ilalum sa pag-amuma sa himungaan, sa natural nga paagi, mopiyak-piyak siya ug motubag dayon ang mama. Husto kana.

³⁸³ Ug usahay mahunahunaan nako kining kasinatian nila sa seminario nga naagian nila ilalum niining dagkung mga incubator sa Louisville ug sa tibuok kalibutan, nga nagapusa og mga magwawali nga linibo ka daghan. Mga incubator sa Pentecostal, ug mga incubator sa Presbyterian, ug—ug mga incubator sa Baptist, iya-iya silang pusa sa ilang—ilang—ilang mga piso. Sila’y, “magpiyak, piyak, piyak,” ug mag-istoryahanay sila mahitungod sa incubator kung asa sila napusa.

³⁸⁴ Pero ang gusto nako nga magkaaduna og usa ka Amahan, og usa ka Inahan. Dalaygon ang Ngalan sa Ginoo! Dili kaayo daghan ang kauban nako nga natawo, pero ang mga anaa dinha maoy akong mga igsoon. Amen. Aduna kami’y Inahan nga motubag dayon sa panahong ikaw. . . usa ka Inahan Nga atua sa Langit, Nga nagbarog nga inahan natong tanan. “Maingon

sa usa ka himungaan nga ginalumluman ang iyang mga piso, ug ginalaylay sila, ug—ug ginaamuma sila. . . gilumluman ang iyang mga piso, maingon usab nga ginalumluman Ko usab kamo. Oh Jerusalem, Jerusalem, makapila nga buut Kong tigumon kamo nga sama sa ginabuhay sa usa ka himungaan sa iyang mga piso! Makapila nga buut Kong himoon kamong Akoang mga piso, pero nagdumili kamo. Duna na kamo'y inyohang mga seminaryo, nga nagpusa og inyohang mga pari. Gitudloan kamo sa mga niini nga mobatok Kanako. Karon wala na kamo'y sundon gawas sa inyong kaugalingon. Anaa na sa unahan ninyo ang inyong pagkaalaut."

385 Karon ginasulti ko kini: Oh, mga tawo, oh, mga tawo, makapila nga buut sa Balaang Espiritu nga lumluman kamo, sama sa buhaton sa usa ka himungaan sa iyang mga piso, Pero gusto n'yo ang inyong pamaagi ang masunod, ang inyo gyud kaugalingong pamaagi ang masunod mahitungod niini!

386 Usa sa niining mga gabii gusto nako nga iwali ang mahitungod sa, "Imong kaugalingong dalan." Abi ninyo, ang gusto gyud ni Cain kaniadto mao ang kaugalingon niyang dalan. Ang gusto pud sa tawo mao ang kaugalingon niyang dalan, sa niining panahon. "Pero dunay dalan nga daw matarung, pero ang katapusan niini mao ang kamatayon."

387 Karon matikdi. "Sa Iyang paghisgot, 'og bag-ong—og bag-ong pakigsaad. . .'" Nagtoo ko, karon kanang. . .Dili diay. Sayup ang nabasa ko.

388 Ika-28 nga bersekulo.

Kay ang kasugoan nagatudlo og mga tawo nga may mga kaluyahon ingon nga mga labawng sacerdote; apan ang pulong sa panumpa, nga ulahi sa kasugoan, nagatudlo og usa ka Anak, nga nagpadayon sa walay katapusan.

389 Dalaygon ang Dios sa kahangturan, tungod sa usa ka Anak nga nagapabilin hangtud sa kahangturan sumala sa laray ni Melquisedec. Ug wala Siya'y sinugdanan. Wala Siya'y katapusan. Ug ang kasugoan dili makahimo sa pagpatungha og unsa man nga sama niana, tungod kay kini karnal. Ang iglesia dili makahimo sa pagpatungha og unsa man nga sama niana, ang mga denominasyon, tungod kay sila karnal. Ang—ang mga seminaryo dili makahimo sa pagpatungha og unsa man nga sama niana. Naninguha sila nga i-edukar ang kalibutan bahin Niini. Naninguha sila nga organisahon kini ngadto Niini. Gisulayan na nila ang tanang paagi ibabaw sa yuta, aron buhaton ang tanan nga mahimo nila, ug nahikalimtan ang pinakamahinungdanon nga butang: "Kinahanglan nga matawo ka diha Niini." Gibuhay ka sa Dios sa kung unsa ka karon, mao gyud, dili tungod nga miundang ka na sa pagbuhat *niini*.

³⁹⁰ Karon, sa mga Nazarene, gidid-an kamo sa pagsul-ob og singsing, dili kamo puedeng magsul-ob og relo, ug kinahanglan buhaton ninyo ang *ingon niini-ug-ingon niana* nga mga butang, kinahanglan *ingon niini* kataas ang abton sa sidsid sa bukton n'yo, ang mga manggas, kinahanglan *ingon niana* pud kataas ang sayal n'yo, ug ang—ug ang mga kalalaken-an gidid-an nga magpamiyembro sa unsa mang kapunongan. Ug dili ka nila bautismohan kung dili ka mosunod. Sige. Ania sab ang mga Katoliko, duna pud sila og ilaha. Ug ania ang mga Methodist, aduna pud sila og ilaha. Ang matag usa kanila dunay sumbanan nga sukdanan. Kung dili gani kamo mohaum sa sukdanan nila, bueno, hangtud dinha na lang kono kamo. Kita n'yo?

³⁹¹ Ug dayon, pero ang tinuod nga butang, mao kini, “Wala gayud ako’y madala! Sa Imong krus lamang ako nagagunit. Oh Dios, ako’y hubo, samdan, nanginahanglan og tabang. Oh, nagaduol ako sa hilabihang pagpaubos, Cristo, nagapahayag nga ako wala gyu’y bili ug wala gyud ako. Dawata ako, Oh Dios.” Kung ingon niana dawaton ka sa Dios.

³⁹² Karon, bisan tingali wala ka kabalo sa imong ABC. Bisan tingali wala mo maila ang kalainan sa lugas sa kape sa lugas sa gisantes. Tingali nakabalo ka, o nahibalo ka man sa kalainan sa direksyong pa-tuo ug direksyong pa-wala, sa kalainan sa tuo nga kamot ug wala nga kamot. Dili na mahinungdanon kung unsa man ang *wala* mo nahibaloan. May usa ra ka butang nga *kinahanglan* gayud imong mahibaloan, og kana maoy, giangkong na ni Jesus Cristo ang imong lugar ingon nga makasasala. Ug nadawat mo ang imong puwesto, para makatindog diha sa Iyang pagkamatarung, nga adlaw-adlaw ginapahayag nga nasayup ka, ug nahigugma Kaniya sa tibuok mong kasingkasing, ug ang bug-os mong mga tinguha nakasentro na ngadto Kaniya, nga makasulod ka sa Langit. Kana lang ang kinahanglan mo nga mahibaloan, kay ang Kinabuhi nga atua kang Cristo kinahanglan maanaa sa imo, o malaglag ka.

³⁹³ Sa dili pa nato tapuson, nadumduman pa ba ninyo kadtong pakigsaad nga gibuhad sa Dios kang Abraham nga walay kundisyon? Unsay gibuhad Niya niadtong gabhiona sa dihang gisulti sa Dios, “Ipakita kanako...” Niadtong gisulti ni Abraham, “Ipakita kanako kung unsaon Mo pagbuhad niana.” Sa ika-16 nga kapitulo, siguro kini, sa Genesis. “Ipakita kanako kung unsaon Mo pagbuhad niana.”

³⁹⁴ Miingon, “Umari ka, Abraham.” Ug gidala Niya si Abraham, miingon, “Lakaw og dad-an mo Ako dinhi og usa—usa ka lakeng-karnero, ug dad-an mo Ako dinhi og usa—usa—usa ka kanding, ug dad-an mo Ako dinhi og usa ka dumalagang baka. Ug gusto Nako nga dad-on mo sila dinhi ug maghalad ka.”

³⁹⁵ Ug miadto na si Abraham ug gidala ang karnero, ug ang—ug ang kanding, ug ang—ang—ang karnero, o, ang dumalagang

baka. Ug gipang-ihaw niya kadto. Mahinlo ang tanan niadto nga mga halad. Ug gipangpikas kadto sa tig-duha, ug gibutang kini sila didto. Dayon miadto siya ug mikuha og duha ka salampati, ug gibutang pud didto ang mga niini. Dayon gibugaw ni Abraham ang mga langgam nga gapangtugdon niadto, samtang nagapaabot nga mokunsad ang Dios. “Karon, Ginoo, anaa na ang halad, unsaon Mo pagbuhat niini? Wala ko kabalo kung unsaon Mo pagluwas sa tawo batok sa kaugalingon niyang kabubut-on. Wala ko kabalo kung unsaon Mo sa pagbuhat niini. Unsaon Mo pagbuhat niana, Ginoo?”

³⁹⁶ Ang sulti sa Ginoo, “Karon tan-awa, Abraham. Usa ikaw ka manalagna. Usa ikaw ka espirituwal, ug masabtan mo kung unsa ang ginasulti Ko.”

³⁹⁷ “Sige, Ginoo, gusto ko kini makita.” Karon gina-drama lang nako kini.

³⁹⁸ “Sige, Abraham, umari ka karon, ug maglingkod ka dinhi ug bugawa kanang mga langgam.” Busa gibugaw niya ang tanan niadtong mga langgam, hangtud nga misugod na nga mosalup ang adlaw.

³⁹⁹ Ug mahibaloan n’yo na lang, mikanaug na ang Dios. Sa dihang mikanaug Siya, kalit na lang katulgon si Abraham. Ang ingon sa Dios, “Abraham, patulogon Ko ikaw.”

⁴⁰⁰ Karon paminawa ninyo kini, igsoong legalista. Kita n’yo, hingpit nga gikuha sa Dios si Abraham sa maong eksena, wala man lang siya’y kalabutan didto. Ug sa ingon niana ka pud Niya nakuha. Mosulti ka, “Oh, gipangita ko ang Dios.” Dili ikaw ang nangita.

⁴⁰¹ Dios ang nangita sa imo, “Walay tawong makahimo sa pag-ari Kanako gawas kon pagadanihon uná siya sa Akong Amahan.” Kita n’yo?

⁴⁰² Ang Dios ang nangita sa imo, dili nga ikaw ang nangita sa Dios. Wala mo kana sukad nabuhat. Ang imong kinaiya dili man tarung. Kay usa man ikaw ka baboy. Wala ka’y uban nga nahibaloan. Basta nagpuyo ka lang sa tangkal para sa baboy. Kana lang ang nahibaloan mo. Gusto mo kaayo kana. Mag-inum-inum og beer, maglipay-lipay sa lunangan, nga ginataban ang asawa sa ubang lalaki, ug ginabuhat ang tanan nga mabuhat nga kadautan, nga mora ba’g okey ra. “Oh, igsoon, lingaw gyud kaayo ta!” Gadahum ka nga maayo kana.

⁴⁰³ Pero nanuktok ang Dios sa imong kasingkasing. [Nagatuktok si Igsoong Branham sa pulpito—Ed.] Kana nga pagpanuktok ang maoy nagpa-usab. Dili nga ikaw ang nanuktok sa Dios; ang Dios ang nanuktok sa imo. Wala gyud kaniadto nanuktok si Adan sa kasingkasing sa Dios; ang Dios ang nanuktok sa kasingkasing ni Adan. Ug anak ka ni Adan. Husto kana. Sa wala pa mahimong anak sa Dios si Adan, pag-usab, kinahanglan nga manuktok usá ang Dios sa iyang kasingkasing. Sa dili pa ikaw mamahimong

anak sa Dios, kinahanglan nga manuktok usá ang Dios sa imong kasingkasing.

⁴⁰⁴ Dayon, nakatulog si Abraham. Ug sa dihang nakatulog siya, unsa ang pinakaunang butang nga nakita niya? Usa ka makalilisang gayud, makahahadlok, makuyaw, nga kangitngit. Ang kamatayon kadto, nga miabot sa tibuok kaliwatan sa tawo. Dayon milantaw siya sa unahan pa niadto, ug nakakita siya og usa ka hudnong nagaaso. Sa dili ka pa magkaaduna og aso, kinahanglan may kalayo ka usá. Kana ang hinungdan nga nagatoo ako mahitungod sa impiyerno ingon nga usa ka lugar nga nagakalayo. Sige.

⁴⁰⁵ Gipakita Niya kaniadto, nga ang matag usa sa kanato paadto sa kamatayon, ug ang matag usa kanato kinahanglan mahiadto sa impiyerno, tungod kay makasasala man kita.

⁴⁰⁶ Karon, dayon, sa unahan niadto, nakakita siya og gamay'ng, puting Kahayag.

⁴⁰⁷ Ug kini nga gamay'ng, puting Kahayag, unsa ba kini nga Kahayag? Unsa ba kadtong puting Kahayag? Kadto ang Haliging Kalayo nga nag-una sa mga anak sa Israel. Natagbo ni Pablo ang maong Haliging Kalayo didto sa dalan niya padulong sa Damasco. Ang mao rang Haliging Kalayo nga nagpagawas kang Pedro gikan sa bilanggoan. Ang mao rang Haliging Kalayo nga ania karong gabhiona.

⁴⁰⁸ Kadtong Eternal, nga Dios nga walay katapusan, Siya Mismo ang naglakaw taliwala niadtong mga gipikas-pikas nga halad, (oh, grabe), paadto-nganhi sa matag usa niadto. "Ingon niini ang Akong buhaton, Abraham. Tan-awa Ako, kung unsay Akong pagabuhaton. Nagahimo Ako og usa ka pakigsaad dinhi. Ug manumpa Ako, nga, sa imong Binhi, magpatungha Ako og usa ka Tigpataliwala. Magpakigsaad Ako sa kamatayon. Ug pagakondenahon Ko ang kamatayon, diha sa unod, tungod kay Ako Mismo ang moabot aron buntogon kini. Abraham," ingon pa, "pinaagi sa imong Binhi, Abraham, nga magaabot, ikaw mamahimong Amahan sa kalibutan, pinaagi sa imong Binhi. Ug dili lamang kanimo, nga ginahatag Ko kini nga saad Kanimo, kondili sa imong Binhi usab nga sunod kanimo." Nasayod na Siya nga moabot mismo ang matag usa kanila. "Dili tungod *kanila*; kondili tungod sa kung unsay Akong pagabuhaton. Buhaton Ko mismo kini, Abraham. Gisaligan Ko kaniadto si Adan, ug wala niya gituman ang sa iyaha. Ug ang matag usa wala mituman. Pero buhaton Ko kini sa Kaugalingon Ko Mismo, ug manumpa sa Kaugalingon Ko Mismo, 'Ako Kining tumanon.'" Amen. Amen. Amen.

⁴⁰⁹ Unsa ma'y atong ginabuhat, sa paghimo nato og pakigsaad? Ingon ko, "Igsoong Neville..." Karon tan-awa n'yo kini, sa kadali. Mosulti ko, "Igsoong Neville, sultihan ta ka kung unsay akong buhaton. Kung magwali ka hangtud...ugma sa gabii,

ug sa sunod nga gabii, padayon hangtud sa Miyerkules, ako na sab ang mowali, sugod sa Miyerkules, padayon hangtud Domingo.” [Blangko nga bahin sa teyp—Ed.] “Mouyon ka ba nianang kasabutan?”

410 “Oo, sir.”

411 Sa ingon niining paagi nato kini ginapahigayon. “Maglamano kita, igsoon.” Kana lang. Ingon niana ang pagbuhat og pakigsaad sa America. Sa ingon nianang paagi kita nagapakigsaad.

412 Karon, sa unsang paagi sila nagapakigsaad didto sa nasud sa Hapon? Kung sa ato ginapahigayon nato, sa pagsulti og, “Buhaton mo ang *ingon niini-ug-ingon niana*, ug buhaton ko pud ang *ingon niini-ug-ingon niana*.” Nagakuha kita og diyutay’ng kusi sa asin, tungod kay ang asin pampalami man. Ug mokuha kita og asin, ug ilabay nako kini ngadto kang Igsoong Neville, ug mokuha si Igsoong Neville og asin—asin ug ilabay kini kanako. Usa kana ka pagkigsaad nga kinahanglan tumanon.

413 Giunsa man kaniadto pagpakigsabot sa pakigsaad ni David Livingstone sa mga lumad sa Africa, para makasulod siya sa yuta nila? Giadtoan niya ug giistorya ang pinaka pangulo, kung puede ba siya makatabok didto, para iwali ang Ebanghelyo ug aron mapahigayon ang buluhaton. Ug mikuha sila og usa ka basong bino. Ingon niini pagpahigayon og pakigsaad sa mga lumad sa Africa. Aduna sila og usa ka basong bino. Ug hiwaan sa pangulong lumad ang iya mismong ugat, ug ipatulo ang dugo sa niining basong bino. Ug hiwaan pud ni David Livingstone ang iya mismong ugat, ug ipatulo kini ngadto sa basong bino. Kutawon nila kini. Inumon ni Livingstone ang katunga niini, ug inumon pud sa pangulong lumad ang katunga niini. Dayon maghinatagay sila og regalo, sa usa’g usa. Sa pangulong lumad, moingon si David Livingstone, “Unsa man ang pangayoon mo sa ako?”

414 Ingon niya, “Kanang puting amerikanang sul-ob mo.” Busa hukason ni Livingstone ang iyang amerikana ug ihatag kini ngadto sa pangulong lumad. Ingon pud siya, “Unsa man pud ang pangayoon mo?”

415 Moingon siya, “Kanang sagradong bangkaw nga gigunitan mo.” Tungod nga, kabalo man siya nga makasulod siya sa lugar pag dala niya kini, busa gidawat niya ang bangkaw. Ug magsoon na sila, tungod naghimo man sila og kasabotan sa pakigsaad.

416 Ug sa pag-adto na niya didto, ug manggawas na ang mga tribo para patyon siya, iisa lang niya kadtong sagradong bangkaw. Ug pagnaitaas na niya, makita nila ug magasulti sila, “Oy, oh, dili nato puedeng hilabtan kana nga tawo.” Ngano man? “Usa man siya ka igsoon sa pagpakigsaad, bisan pa nga puti siya, bisan nga wala pa nato siya sukad nakita.” Wala gyud nila hibangkaagan nga itum diay sila hangtud nga nakita nila siya.

Wala pa sila sukad nakakita og ingon niana nga tawo. “Pero usa siya ka igsoon sa pagpakigsaad. Bitbit niya sa iyang kamot ang bangkaw sa pangulo.”

⁴¹⁷ Pagkaanindot nga hulagway kini, sa karon, kining pag-inum sa pakigsaad sa Dugo ni Ginoong Jesus, uban sa gahum sa Espiritu Santo nga anaa kanato! Nagapadayon kita diha sa Ngalan ni Jesus, ug kining mga ilhanan maganunot kanila nga nahisakop niini. Kini ang sagradong Bangkaw sa Pangulo. Nakita n’yo na kung sa unsang paagi kini ginapahigayon, ang pakigsaad?

⁴¹⁸ Giunsa ba nila kini pagpahigayon niadtong sidlakanon pang panahon? Nanagpanumpa sila, sa usa’g usa. Nagapatay sila kaniadto og mananap, tungaon kini, ug motindog sila sa mismong taliwala niadto. Ang—ang duha ka lalaki magtindog sa tunga niadto, sa gitunga nga mananap. Ug sabotan nila ang usa ka pakigsaad. “Kung mapakyas akong tumanon *kini*, kung mapakyas akong buhaton *kana*, aba, *kini* ug ang *ingon niini-ug-ingon niana*, himoa nga mahisama ang akong lawas sa niining patay’ng mananap. Himoa nga ang akong lawas mahisama sa niining patay’ng mananap.” Ug sa dihang nahimo na nila kana, kuhaon nila kining pakigsaad ug magtindog sa taliwala *niini*; manumpa, ipanumpa nila nga tumanon nila kini. Ug gision nila ang papel, gision sa duha, hangtud matunga, ug itunol ang natunga nga bahin ngadto sa usa sa ila, kadtong katunga nga bahin pud sa usa. Sa usa ka pihong panahon magkita sila. Ug kinahanglan mamatay sila, kung mapakyas sila sa pagtuman sa maong gipanumpa; ug mamahisama niadtong patay’ng mananap. Buweno.

⁴¹⁹ Namatikdan ba ninyo ang tulo ka mananap? Ang hingpit; ang karnero, kanding, ug ang tulo ka hingpit nga halad. Unsa man kadto ang karnero . . . Unsa man kadto ang salampati? Ug para sa unsa man kadtong duha ka salampati? Ang duha ka salampati gihalad pareho para sa kaluwasan ug pagka-ayo, diha sa—diha sa . . . nga kabahin na niini. Kita n’yo? Ang paghalad kaniadto tungod sa sala ginahimo sa lahilahi nga paagi, pero ang pagka-ayo nagpadayon nga mao ra gihapon, ug mao man usab ang kaluwasan nga nagpadayon nga mao ra gihapon. Ang duha ka salampati, nga wala gitunga sa duha, nagpasabot nga sila nagrepresentar, og duha. Ang kaluwasan . . . “Pinaagi sa Iyang mga labod kita nangaayo. Siya gisamaran tungod sa atong mga kalapasan. Tungod sa Iyang mga labod kita nangaayo.” Gibutang sila sa kilid, nga wala gibulag. Pero ang pakigsaad, ang lawas sa mananap (tulo sila) gitunga-tunga. Nakita n’yo? Dayon sa dihang nabuhat na nila kadto, ilang gipikas ug naghimo sila’g pakigsaad.

⁴²⁰ Matikdi ninyo kung unsa ang ginasulti sa Dios kang Abraham: “Didto sa Kalbaryo, didto sa Kalbaryo, sa imong Binhi. Gikan sa imo moabot si Isaac, gikan kang Isaac moabot si

Ingon niini-ug-ingon niana, si Jacob, gikan kang Jacob moabot si Joseph, gikan kang Joseph, ang nagsunod, ug ang nagsunod, ug ang nagsunod pa, nga mga kaliwat, hangtud, sa katapusan, pinaagi nianang matarung nga Binhi!" Iyang. . .

⁴²¹ Bag-o lang Niya gisulti, dinhi, nga giingon nga ang atong Ginoo motungha sa usa ka nasud nga wala makaila. Walay gisulti si Moises og bisan unsa, nga ang Ginoo mogikan sa kaliwatan sa mga sacerdote. "Ang atong Ginoo motungha gikan sa banay ni Juda." Dili gikan kang Levi, tungod nga sila karnal man nga mga legalista. Pero ang atong Ginoo moabot gikan kang Juda. Himaya! Tan-awa. Kon diin gikahatag ang maong saad!

⁴²² Paminaw kamo og ayo karon, sa pagtapos na nato. Ug didto sa Kalbaryo, mikanaug ang Dios ug gikuha ang lawas sa Iyang Kaugalingong Anak, kon diin Siya nagpuyo, ug gipikas-pikas Niya kadto didto sa Kalbaryo. Nagkadugo Siya, nasamdan, napangos, ug midulot ang bangkaw ug giduslak Siya, ug mibuhagay ang Iyang Dugo. Ug ingon Niya, "Amahan, sa Imong mga kamot itugyan ko ang Akong Espiritu." Giduko Niya ang Iyang ulo. Ug mitay-og ang yuta, ug nagpangidlap ang mga kilat, ug nagdahunog ang mga dalugdog. Ginasulat na niadto sa Dios ang Iyang walay katapusang pakigsaad.

⁴²³ Ug gikuha Niya ang patay Niyang lawas gikan sa lubnganan, sa unang adlaw sa semana, ug gidala kini pasaka sa Langit, ug naglingkod didto ingon nga mao ang Labaw'ng Sacerdote, ingon nga usa ka pagpahinumdam; nagalingkod didto, nga hingpit, hangtud sa kahangturan. Ug gipadala Niya ang Espiritu nga Iyang gigilis gikan niadtong lawas, para mokanaug balik sa Iglesia. Ug kinahanglan mabatonan nianang Iglesia ang mao ra nga Espiritu nga atua kaniadto nianang lawas, o dili kini mohaum ngadto Niini didto sa pagkabanhaw. Kinahanglan hingpit gyud nga mohaum ang duha ka bahin. Ug kung kining Iglesia dili hingpit, nga eksakto gyud nga mohaum sa mao rang Espiritu nga atua kaniadto kang Cristo, dili gayud kamo mahiuban sa Pagsakgaw.

⁴²⁴ Kana ang walay katapusang pakigsaad, igsoon. Susihon mo gyud, ang imong kaugalingon, kung unsa ba ang anaa sulod sa imo mismong kasingkasing. Higugmaa ang Ginoo. Siguraduha gyud nga luwas ka. Ayaw pagpamasin lang niini. Nagasugal ka kung ingon-ana. Oh, kamo, kita nga mga Amerikano, mahilig magsugal, pero ayaw gyud pagsugal mahitungod Niana. Siguraduha gyud nga husto kamo. Dili tungod nga nagpamiyembro kamo sa simbahan, kondili tungod nga matuod gayud nga kamo natawo na pag-usab, miabot na si Cristo sa inyo, diha sa Persona sa Espiritu Santo.

⁴²⁵ Karon, isip pagpasalamat, usab, sa pagtapos nako dinhi. Kinahanglan magmalipayon kita, nga makita nato nga ang mao rang Espiritu nga atua kaniadto kang Jesus Cristo, ania mismo

sa atong taliwala, nga ginabuhat ang mao rang mga butang nga gibuhat Niya niadtong ania pa Siya sa yuta! Daw sa unsa kita kaangay nga magmalipayon kung ingon-ana!

Mag-ampo kita karon, samtang ginaduko nato ang atong mga ulo.

⁴²⁶ Ginoo, usa kini ka maanindot nga adlaw. Bisan pa, nga kanunay kong ginabati kini, ako nagakapakyas. Dili ko Kini mairepresentar sa husto, Ginoo. Nagapangamuyo ako nga pasayloon Mo ako sa mga burong kong pamaagi. Oh, ginasugid nako sa atubangan Mo ang akong mga kasal-anan, ug nagahangyo og kalooy, sa paghibalo nga adunay halangdon Labaw'ng Sacerdote nga nagatindog sa tuong kamot sa Dios, didto sa Kalangitan, Nga dili sumala sa pagkasacerdote ni Aaron, ni sumala sa mga balaod ug mga legalistang pamaagi ug ingong-anang mga butang. Kondili nagalingkod Siya Didto tungod sa grasya sa Dios kaniadto nga nagalantaw sa umalabot, sa wala pa ang pagkatukod sa kalibutan, ug nakita na ako dinhi sa kalibutan, ug namatay para sa akong mga sala, aron ibalik ako ngadto sa Gingharian sa Dios. Nagapasalamat ako Kanimo, Amahan, para niini.

⁴²⁷ Tungod nga, kining Espiritu nga nagahari karon sa Imong mga katawhan Eternal man ingon nga ang Dios Eternal. "Akong ginahatag kanila ang Kinabuhing Eternal, Kinabuhing dayon, Kinabuhing walay katapusan, ug dili gayud sila mahanaw." Ug didto sa Paghukom, wala gayud sila didto. Gilabang na nila ang mga paghukom. Nahidangat na sila ngadto sa Himaya. "Ug kung kining yutan-ong payag matun-as na, adunay usa nga nagapaabot kanato didto sa padulngan nato." Salamat tungod niana, Ginoo.

⁴²⁸ Nagaampo ako karon, nga kung adunay usa dinhi, karong gabhiona, nga wala pa nakainum sa tinuod nga Dugo sa pakigsaad, nga wala pa masayod kung unsa ka mahinungdanon Kini, wala pa masayod kung unsa ka mahinungdanon ang matawo pag-usab, ang magkaaduna og usa ka tinuod nga pagpakigfellowship kang Cristo sa ilang kasingkasing, o sa iyang kasingkasing, hinaut nga ilang dawaton Siya karon, samtang nagapaabot kami ug ginahatag ang ingon niini nga kahigayonan. Ug nianang Adlaw, nagapangamuyo kami nga narepresentar unta namo ang Ebanghelyo sa husto niining Kahayang. Nagaampo kami, sa Ngalan ni Cristo.

⁴²⁹ Samtang giduko nato ang atong mga ulo, aduna ba dinha nga gustong mopataas sa iyang kamot ngadto kang Cristo, ug moingon, "Cristo sa Dios, kaloy-i intawon ako. Itugot sa ako, nga usa ka dili-takus Mo nga alagad, nga madawat ko unta karon ang Balaang Espiritu sa akong kasingkasing. Ug mahatagan unta ako og kasigurohan ug gugma nga gikinahanglan gayud nako?" Kung wala mo pa Kini madawat, mahimo ba nga ipataas lamang

ang imong mga kamot ngadto Kaniya, nga nagaingon, “Ginoo, kini usa ka ilhanan nga gitinguha ko gyud Kini”? Mahimo ba nimo nga ipataas ang imong kamot? Panalanginan ka sa Dios dinha sa luyo, gining. Ang Dios magapanalangin kanimo dinha, sir. Panalanginan ka dinha, sir. Ang Dios magauban kanimo. Maanindot kana. Kining lalaki nga anaa sa tumoy dinhi, panalanginan ka sa Dios, akong igsoon. Ug aduna pa ba’y uban, sa dili pa nato tapuson, samtang nagapaabot pa og pipila ka minuto. Panalanginan ka sa Dios dinha sa luyo, dong. Aduna pa ba’y uban?

430 “Nagapangandoy ako karon. Nagapangandoy ako, Ginoong Dios. Nasayod Ka sa akong kasingkasing. Nasayod Ka kung unsay akong ginahunahuna. Ikaw, ‘Ang Espiritu sa Dios mas buhi ug mas mahait pa kay sa espada nga duhay-sulab, nga nagadulot ngadto sa gitagboan sa mga utok sa bukog, ug usa ka Motugkad sa mga hunahuna sa kasingkasing.’” Palandunga n’yo kana. Nasayod Siya sa inyo mismong ginahunahuna, sa inyong mga katuyoan.

431 Mahimo ba nga ipataas ang inyong kamot? Moingon, “Kaloy-i ako, Dios, sa niining mga oras. Ako—gusto kong ipahibalo Kanimo nga kabalo ko nga nasayup ako, ug naamgo ko kini, busa gusto kong maihusto.” Sige, samtang padayon natong ginaduko ang atong mga ulo, nga nagaampo karon, pamalandunga ninyo kini sa kadali. Ayaw natong dalion kini.

Rock of Ages, cleft for me,
Let me hide myself in Thee;
Let the water and the Blood,
From Thy flowing side . . .
Be for sin the double . . . (Dobleng tambal, mao
nga nanumpa Siya tungod niini, duha ka
butang nga walay pagkausab.)
Save from wrath and make me pure.

While I draw . . .

432 Oh Ginoo, itugot mismo karon nga maamgo unta namo tanan nga kining mga gininhawa nga among giginhawa paspas nga lumalabay. Wala kami nahibalo kung pila na lang ka ginhawa ang aduna kami sa unahan namo. Kining tanan pinaagi lamang sa Imong halangdong kabubut-on. Ikaw ang nagdeterminar niini. Oh, kaloy-i intawon kami. Ug sa mga nagpataas sa ilang mga kamot, Ginoo, dili na kinahanglan nga hinganlan pa sila. Nakaila ka sa matag usa kanila. Pero ako lamang ginahalad kining pag-ampo sa pagpataliwala para kanila. Ginaampo ko nga tangtangon Mo ang pagsudya diha sa ilang kasingkasing, ug tugotan sila nga makaduol nga walay pagpanuko, karon mismo, nganha sa Trono; magaduol nga may kaisog nganha sa Trono sa Dios, angkonon ang ilang pribilihiyong hinatag-sa-Dios. Ikaw man ang nag-aghat kanila nga magpataas sa ilang

mga kamot. Dili nila mabuhay kuni kung sa ilang kaugalingon lang. Ug nagaampo ako, Dios, nga itugot Mo kuni sa Ngalan ni Jesus. Amen.

. . . myself in Thee;

Karon, simbahan ninyo Siya karon.

Let the water and . . . (Oh, maanindot gyud!)

From Thy wounded side which flowed

Be of sin the double cure,

Save from wrath and make me pure.

⁴³³ Pila man ang nagbati og pagkamaanindot karon? Ipataas ang inyong kamot, moingon, “Dalaygon ang Ginoo!” [Nagaingon ang kongregasyon, “Dalaygon ang Ginoo!”—Ed.] Oh, kahibulongan gayud Siya! Oh!

There’s Room At The Fountain. Kabalo ka ba niana, Igsoong babayeng Gertie? Awiton nato. Pila man ang gusto nianang kanta? Karon magpahigayon kita og buluhaton sa pagbautismo, sa makadiyut lang. (Ikaw ang magbautismo kanila?) Sige.

. . . room, yes, there is room,

There’s room at the Fountain for thee;

Room, room . . .

⁴³⁴ Sige. Kadtong mga magpabautismo, sa sulod *niini* ang mga kalalaken-an, sa *niining* usa pud ang mga kababayen-an, sige, silang mga pagabautismohan sa balaang Ngalan sa atong Ginoo.

. . . good to thee,

There’s room at the Fountain for thee;

God has been so good to me,

There’s room at the Fountain for thee.

⁴³⁵ Dungan ang tanan karon:

Room, room, yes, there is room,

There’s room at the Fountain for thee;

Oh, room, room, yes, there is room,

There’s room at the Fountain for thee.

⁴³⁶ Oh, gustong-gusto ko kanang karaang kanta. Di ba kamo man usab?

There’s room at the Fountain for thee;

Oh, room, room, there’s plenty of room,

There’s room at the Fountain.

⁴³⁷ Karon, samtang atua na sa sulod ang atong anciano sa iglesia, aron iandam ang pagbautismo, gusto kong isaysay sa mga nanambong. Ug gusto kong ipahibalo sa ako sa mga diyakono nga anaa dinha sa sulod, kung madungog ba nila ako sa sulod, ipahibalo sa ako kung andam na sila, moanhi lang ug—ug sultihan ako, ug para mabalhin nato ang platar sa mga mikropono. Gusto namo nga makita ninyong tanan kuni. Diyes minutos lang man kuni, ug tapuson na ang buluhaton sa iglesia.

438 Karon gusto kong basahon sa inyo ang pipila sa mga balaang Kasulatan. Gusto kong basahon ang mga niini diha sa Libro sa Mga Buhat. Ug gusto kong sugdan sa ika-12 nga bersekulo sa Ika-2 nga kapitulo sa Mga Buhat.

439 Karon, gusto kong matikdan ninyo sa ika-16 nga kapitulo sa San Lucas, o sa San Mateo, nagatoo ko anaa kini dinha, nga si Jesus kaniadto nagalugsong na gikan sa bukid. Sila . . . Gisulti Niya sa Iyang mga tinun-an, “Sumala sa sulti sa mga tawo kinsa man kono Ako nga Anak sa Tawo?”

440 “Ug miingon ang pipila kanila, bueno, Ikaw ‘si Elias.’ Ug nagaingon ang uban nga Ikaw—Ikaw ‘ang Propeta.’ Ug nagaingon ang uban nga Ikaw *ingon nini o uban pa.*”

441 Ingon Niya, “Apan kamo unsa ma’y sulti ninyo kung Kinsa Ako?”

442 Ug mitubag si Pedro, “Ikaw mao ang Cristo, ang Anak sa buhi nga Dios.” Husto kana?

443 Misulti si Jesus, “Bulahan ikaw, Simon Bar-jonas, kay wala kini gipadayag kanimo sa unod ug dugo. Wala mo nakat-onan sa seminario. Wala mo nakat-onan Kini pinaagi sa tawo.” Miingon, “Apan ang Akong Amahan nga anaa sa Langit ang nagpadayag niini kanimo. Ug nagasulti Ako nga ikaw mao si Pedro. Ug ibabaw niining bato pagatukuron Ko ang Akong Iglesia. Ang mga ganghaan sa impiyerno dili gayud makabuntog Niini. Ug Akong ikahatag kanimo ang mga yawe sa Gingharian sa Langit.” Husto ba kana? “Ug bisan unsa nga imong pagaluagan sa yuta, pagaluagan Ko kini sa Langit. Kung unsa ang imong pagabugkuson sa yuta, kini pagabugkuson Ko sa Langit.” Tumanon ba gyud Niya Kana? Wala unta Niya Kini gisulti. Karon, sa pagdagan sa panahon, karon, atua na kang Pedro ang mga yawe sa Gingharian.

444 Karon, kamong mga Katoliko, siguro naghunahuna kamo niini, nga moingon kamo, “Gitukod man ang iglesiang Katoliko kang Pedro.” Sige, susihon nato. “Anaa kono sa ila ang mga yawe. Anaa kono sa iglesiang Katoliko hangtud karon ang mga yawe.”

445 Susihon nato kung unsay gibuhat ni *Pedro* sa maong mga *yawe*, kita n’yo, ayha nato mahibal-an. Ang gisulti sa Biblia, kang Pedro ug sa uban pang mga apostoles, “Panglakaw kamo sa tibukok kalibutan. Kinsa ganing mga sala ang inyong pasayloon, kini pagapasayloon kanila. Kinsa ganing mga sala ang inyong pahawiran, kini pagahawiran kanila.” Niana, ginasulti Ko kini aron nga . . . Tingali dunay dili makasabot kung unsa ang buut kong ipasabot. Ang gisulti ni Jesus ngadto sa mga apostoles, “Kang kinsa mang mga sala ang inyong pasayloon, Ako usab kining pasayloon. Ug kung kinsa mang mga sala ang dili ninyo pasayloon, ug pagahawiran kini batok kanila, pagahawiran Ko kini batok kanila usab.” Mao kana ang gisulti ni Jesus.

446 Tan-awa n'yo ang iglesiang Katoliko nga ginapamugos kana.

447 Pero susihon nato kung giunsa nila pagbuhat niadto. Dayon pag mahibal-an na nato kung giunsa nila pagbuhat niadto, kung ingon niana kinahanglan nga buhaton nato kini sa mao gihapon nga paagi. Karon susihon nato.

448 Adlaw niadto sa Pentecostes. Pormal pa lang nga pagsugod kadto sa Iglesia. Nagtigum silang tanan didto sa usa ka lawak sa itaas. Nanggawas gikan didto ang mga kalalaken-an, nga nanagpanulti'g nagkalainlaing pinulongan. Ngano man? Ang matag pinulongan ubos sa Langit girepresentar didto. Dunay Ingles didto, usab. Ang matag pinulongan ubos sa Langit siguradong atua gyud didto, kung unsa man nga pinulongan nga aduna ang tawo niadtong adlaw. Padayon niya nga gihinganlan ang daghan pang mga pinulongan, ug kung unsa nga ang mga taga Crete ug mga langyaw, ug bag-ong mga kinabig nga taga-Roma, ug—ug—ug ang mga taga Arabia, ug ang tanan nanagsulti ug maanin- . . . Karon, wala sila nanagpanulti og dili-mailhan nga mga pinulongan. Nanagpanulti sila og mailhan nga mga pinulongan, sa mga tawo. Dili sa dili-mailhan nga mga pinulongan, kondili sa mga pinulongan nga masabtan sa matag usa. Ang makasasala, ang dili-magtotoo, mapatalinghugan mismo kung kung unsa ang iyang ginasulti. “Madungog man sa matag usa kanato ang ato mismong pinulongan nga—nga atong namatan?”

449 Karon matikdi ninyo. Karon ania ang pangutana. Karon, “Ang uban kaniadto nanagbugalbugal.” Sa ika-12 nga bersekulo, sige.

Ug hingkulbaan silang tanan, ug . . . nangalibog, nga nagaingon ang usa'g usa, Unsa ang kahulogan niini?

Apan ang uban nanagbugalbugal ug nanag-ingon, Sila'y . . . nangahubog sa bag-ong bino.

450 Ginabiaybiayan nila sila. Tungod, sa paagi nga ginabuhat nila kadto? Nagasamparay sila sama sa tawong hubog, sama sa tawong hubog. Nanagpanulti, nga wala masabti kung unsay ginapanulti nila, pero nagawali sila kaniadto sa kongregasyon diha sa mga pinulongan nga wala nila nahibal-an, pero nasabtan sa kongregasyon. Kita n'yo? Sige.

Apan ang uban . . . miingon, Sila'y nangahubog sa bag-ong bino, tan-awa ninyo ang linihokan nila.

Apan ang uban nanagbugalbugal, nga nanag-ingon, Sila'y . . . nangahubog sa . . .

“Pero si Pedro . . .” Sige, dong! Anaa man sa imo ang mga yawe.

Apan si Pedro, mitindog uban ang napulog-usa, gipatugbaw niya ang iyang tingog, ug nag-ingon kanila, . . .

Karon, hinumdumi ninyo, kadto ang unang pagsugod sa Iglesia.

...Kamong mga taga-Judea, ug...kamo nga nagapuyo sa Jerusalem, maila ninyo unta kini, ug patalinghugi ninyo ang akong mga pulong:

Kay kini sila dili mga nangahubog, ingon sa inyong pagdahum, kay karon ikatolo pa lamang ka takna sa adlaw.

Wala pa gani abli niadtong mga orasa ang mga balay-imnanan. Kita n'yo?

Apan kini mao hinoon ang giingon na sa manalagna nga si Joel;

...mahitabo sa ulahi nga mga adlaw, nagaingon ang Dios, Akong igabubo ang akong Espiritu sa tanang unod: sa inyong mga anak nga lalaki...mga babaye, ug sila magapanagna, ug ang inyong mga batan-on makakita og mga panan-awon, ug ang inyong mga tigulang managdamgo og mga damgo:

Ug sa akong mga ulipon nga lalaki ug...akong ulipong babaye akong igabubo niadtong mga adlaw usab ang akong Espiritu;...managpanagna sila:

Ug ako magpakita og mga katingalahan sa langit sa kahitas-an, ug mga ilhanan sa yuta sa ilalum;...

Karon, si Pedro kini karon nga nagawali, siya nga anaa kaniya ang mga yawe.

...dugo,...kalayo,...mga alisngaw sa aso:

Ang adlaw pagaalid-an sa kangitngit,...ang bulan mahimong dugo, sa dili pa ang daku ug dayag nga adlaw sa Ginoo nga moabot:

Ug mamahitabo kini, nga bisan kinsa nga magatawag ngadto sa ngalan sa Ginoo maluwas siya.

Kamong mga tawong taga-Israel, patalinghugi ninyo kini nga mga pulong; si Jesus nga Nazaretnon, tauo nga gipamatud-an kaninyo sa Dios pinaagi sa mga katingalahan ug mga kahibulongan ug ilhanan, nga iyang gibuhat...sa taliwala ninyo,...sa inyong kaugalingon...hingbaloan ninyo:

Grabe gayud nga badlong? Anaa sa iya ang mga yawe, kabalo na mo. Nga...

Siya, nga gitugyan ingon sa dili-mabalhin nga pagbulot-an ug ang daang-pagkahibalo sa Dios,...

Tan-awa. Sa unsa man diay nga paagi aron Siya makaikyay? Ingon nga gibut-an na man daan sa Dios nga mamahimong ingon niana. Kita n'yo? Ang pagkahibalo-nang-daan sa Dios!

⁴⁵¹ [Nagaingon ang usa ka igsoong lalake, “Andam na?”—Ed.]
Sa kadali lang. Palihog ingna sila, maghulat lamang og pipila ka
minuto, hangtud mahuman na nako nga basahon ang Kasulatan.

*. . . inyong gidakup, pinaagi sa kamot sa mga tawong
masupilon, inyong gilansang ug gipatay:*

*Nga gibanhaw sa Dios, ug nabadbaran sa mga
kasakitan sa kamatayon: kay dili gayud mahimo . . . nga
mahawiran siya niana.*

*Kay si David namulong mahitungod kaniya, nakita ko
gihapon ang Ginoo sa kanunay . . . nga anaa sa akong
tuong kamot, ug aron ako nga dili matarug:*

*Tungod niini nahinangup ang akong kasingkasing, ug
ang akong dila nihimo’g kalipay; lakip . . . ang akong
unod usab nagapahulay sa paglaum:*

*Kay dili mo gyud pagpasagdan ang akong kalag sa
hades, dili mo gyud itugot nga ang imohang Balaan
makakita sa pagkadunot.*

*Gipaila mo sa ako . . . akong—akong mga dalan, ang
akong mga daghang kinabuhi; nga pagapun-on mo ako
sa kalipay ug sa atubang sa akong nawong.*

*Mga kalalaken-an ug mga kaigsoonan, makahimo
ako sa pagsulti nganha kaninyo sa dakung kasayon
mahatungod kang David nga patriarca . . . namatay
siya ug gilubong, ug ang iyang lubnganan ania
kanato . . . karong adlaw.*

*Tungod kay manalagna siya, ug hingbaloan nga ang
Dios nanumpa uban ang usa ka panumpa . . .*

Bag-ohay ko lang kining nawali.

*. . . nga sumala—sumala ngadto sa mga bunga sa iyang
hawak, iyang himoong . . . nga sa unod, palingkoron
niya si Cristo sa iyang trono;*

Sama gyud sa bag-o ko pa lang nahuman nga wali. Mao usab
ang ginawali dinhi ni Pedro.

*Ug sa nakalantaw nga daan (Nakita na kini sa propeta
kaniadto.) nagsulti sa pagkabanhaw ni Cristo, nga wala
pagpasagdi ang iyang kalag sa hades, ni pasagdan ang
iyang unod nga makakita sa pagkadunot.*

*Kining Jesus nga gibanhaw sa Dios, nga tungod niini
ang tanan nga saksi kami.*

*Busa sa gibayaw, ug sa tuong kamot . . . nga anaa
sa toong kamot, gibayaw sa langit, sa nakadawat
sa Amahan . . . saad sa Espiritu Santo, iyang . . . gibubo
kini, nga inyo gayud ginatan-aw ug ginapatalinghugan.*

*Kay si David wala makasaka sa langit, (ang propeta):
apan siya gayud ang nagsulti mismo, Ang GINOO nagsulti
sa akong Ginoo, Lumingkod ka sa akong tuong kamot,*

*Hangtud nga igabutang ko ang imong mga kaaway sa
tumbanan sa imong mga tiil.*

*Busa (paminaw niini) pahibaloan sa matuod gayud
ang tibuok nga balay ni Israel, nga gibuhat sa Dios kini
nga si Jesus, nga inyong. . . gilansang sa krus, ingon nga
Ginoo ug Cristo.*

Pagkaklaro na niana mismo, dili ba?

*Karon sa nakadungog sila niini, silang mga
makasasala, gisakitan sila sa ilang mga kasingkasing,
ug nanag-ingon kang Pedro. . . Mga kalalaken-an. . .
ug Pedro ug. . . ang ubang. . . ang mga apostoles, Mga
kalalaken-an ug mga igsoon, unsay pagabuhaton namo?*

⁴⁵² Sige. Ania na. Unsa man kadtong anaa kaniya? Ang yawe, ang yawe sa Gingharian. Asa man ang Gingharian? Anaa sa sulod ninyo. Husto ba kana? Ang Espiritu Santo mao ang Gingharian sa Dios. Kabalo kita niana. Nangatawo kita pasulod ngadto sa Gingharian, ingon nga mga alagad ug mga pinadala. Tan-awa. Anaa kaniya ang mga yawe sa iyang kilid. “Unsa ma’y buhaton mo niining butanga?” Mao kadto ang unang higayon nga giablihan ang pultahan.

⁴⁵³ Karon, ang pangutana patunong sa magwawali, sa pinakaunang higayon, ngadto sa nagkupot sa yawe. Nagatoo ko kung gisulti niya, “Tumindog ka sa imong ulo,” matuman kadto.

⁴⁵⁴ “Bisan unsa ma’y inyong pagabugkoson sa yuta, pagabugkoson Ko sa Langit.” Sige. “Bisan unsa ma’y isulti ninyo, igasulti Ko ang mao rang butang. Anaa sa inyo ang yawe.” Sige. Ginasulod na niya ang yawe sa pultahan.

. . . Unsa ma’y inyong buhaton? *Kaninyo mga igsoon, unsa ma’y among buhaton?*

*Karon sa nakadungog sila niini, sila’y gisakitan ang
ilang kasingkasing, ug nanag-ingon. . . Kamong mga
igsoong, . . .*

*. . . si Pedro miingon kanila, Maghinulsol kamo, ug
managpabautismo ang tagsatagsa kaninyo sa ngalan ni
Jesus Cristo alang sa pagpasaylo sa sala, ug madawat
ninyo ang gasa nga Espiritu Santo.*

*Kay ang saad alang kaninyo, ug sa inyong mga anak,
ug sa kanilang tanan nga atua sa halayo, bisan ang
kapid-an nga pagatawgon sa Ginoo nga atong Dios.*

Mao na kadto sa hangtud-hangtud. Walay mga tawo nga sukad, sa unsa mang panahon, ang makahimo gayud, nga makasupak Niana.

455 Niadtong miabot ang iglesiang Katoliko, imbes nga ituslob, nagwisikwik na hinoon sila. Imbes nga gamiton ang Ngalan ni Jesus, ang gigamit nila, “Amahan, Anak, ug Espiritu Santo.” Wala ra ba gyud nagtudlo niana ang Biblia.

456 Ang matag tawo, gikan niadtong panahona, gipangbautismohan pinaagi sa pagtuslob diha sa Ngalan ni Jesus Cristo. Ug ang uban kaniadto gipangtuslob ni Juan nga Bautista, nga maoy nagbautismo kang Jesus, ug gisulti kanila ni Pablo nga dili nila madawat sa ingon niana nga paagi ang Espiritu Santo. Kinahanglan silang mobalik ug mabautismohan, pag-usab, sa Ngalan ni Jesus, sa dili pa nila madawat ang Espiritu Santo. Pila ang nakahibalo nga ingon niana ang gisulti sa Kasulatan? Mga Buhat, sa ika-19 nga kapitulo. Tan-awa. Tungod kay, ang Gingharian sa Langit giselyohan man batok sa unsa mang ubang paagi, kondili sa panumpa lang pinaagi ni Jesus Cristo, nga maoy magpahimo niini nga madawat didto sa Langit.

...Maghinulsol kamo, ug managpabautismo ang matag usa kaninyo sa ngalan ni Jesus Cristo alang sa kapasayloan sa inyong mga sala,...inyong madawat ang gasa sa Espiritu Santo.

Tungod kay, ang saad alang kaninyo, ug sa inyong mga anak,...ngadto kanila nga atua sa *halayo*, *bisan pa sa kadaghan nga pagatawgon sa Ginoo nga atong Dios*.

Amen. Mag-ampo kita.

457 Amahang Dios, karong gabhiona, sobra sa dise-nuebe ka gatus na ang milabay, apan luyo niana ang pagkamatinuuron ug ang intergridad sa mga kasingkasing sa tawo nagahilak gihapon ngadto sa Dios, sama sa mga bata nga nagahilak alang sa gatas sa suso sa ilang inahan. Gihigugma namo Ka, Ginoo. Dili kami mabuhi kung wala Ikaw. Sama sa gisulti ni David, “Ang akong kalag nangandoy sa pagpangita Kanimong, ingon nga ang lagsaw nangandoy sa pagpangita sa tubig sa sapa.” Kinahanglan nga magkaaduna siya Niini, kay kondili mamatay siya.

458 Ug, Amahan, gisuhid namo ang tibuk nga Kasulatan, pabalik-balik. Dili para malahi kami, kondili tungod kay nakita namo kining mga seminario, kining mga estudyante sa teolohiya sa karong panahon, nga nanagwali sumala sa mga sugo sa tawo, ug dili sa mga sugo sa Dios. Busa, Ginoo, wala kami nagasalikway sa maong mga tawo, kondili ginasalikway namo kanang mga butang nga ilang ginapangtudlo. Busa, Ginoo, nangamuyo kami nga sila mamahimong igsoon namo unta. Nangamuyo kami nga pasayloon Mo sila sa ilang kasaypanan. Ug nagaampo kami nga mamalik sila sa Kasulatan, basahon Kini, dili sa paagi nga pagtudlo Niini sa kung unsang seminaryo, kondili sa paagi nga gisulat Kini sa Dios.

⁴⁵⁹ Nagaampo kami, Dios, karon, nga ang mga nanagduol karong gabhiona para mabautismohan, samtang nagalakaw ang among maisogon nga pastor padulong niining pulpito, aron iwali ang Ebanhelyo, kining mao rang Ebanghelyo, ug dayon ngadto sa lugar bautismohan, para maglusbog, itugot, Ginoo, nga madawat sa matag usa kanila ang Espiritu Santo, 'kay nagsaad Ka, "Inyong madawat ang Espiritu Santo." Hinaut nga ang Espiritu sa Dios magahulat ibabaw sa tubig, para dawaton ang mga nanagduol karong gabhiona, kay ginatugyan namo sila sa Imong mga kamot, sa Ngalan ni Jesus Cristo. Amen. 🙏

57-0922E Mga Hebreohanon, Kapitulo Siete #2
Branham Tabernacle
Jeffersonville, Indiana U.S.A.

CEBUANO

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®. Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org